

PABOJA ETEHUE'YO SHOMAJO BA'E CUANA HUASIJJE

ROMANOS

**Pabohua esohui tehue canaje Jesosaja epeejji
cuana Shoma cuiñajjijo ba'e yasijje**

1 ¹Eya Pabo bajjani. Jesosaja epeejji cuana, eyaya jiquio esohui tehueña miquiana huasijje Shoma cuiñajjijo ba'eca huasijje. Eya ca ca iña Jesosa Quitoja huoojea'yo ojaya esohui huohuijji. Eyacuiñajjija eya babaca canaje ojaya esohui huohuijji epojji. Ohuaya eya huoojea canaje quea huiso meshi yasijje ojaya esohui quea pame nee Jesosajo huohuiya.

²Yahuajo nei nei Eyacuiñajjija ma esohui quea pame Jesosajo ojaya etehue'yojo tehue mee ca poa ojjañaja ebajji. Ojaya esohui huohuijji yahuajo nei ba'le ma esohui huohui neinei mee ca poa pea'ai. ³Jamaya Eyacuiñajjija eseya ba mee cani oja Bacua Ejja oe nei Jesosa ese jayojjaya yamijji poeyanaje. Cuayanaje Maniaja bacua. Jodio cuanaja emeshi mese quea pame nee Dabi bajjani ojaya etiiquiana, huapa pojjeama yahuajo ba'ya poa. ⁴Oya Jesosa Quito ese jayojjaya yamijji poanaje. Oya Eyacuiñajji nei pea'ai, oja Chii jayojja nei nei, mimishi'ama nei nei. Oya mano'ya poa. Jamatii Eyacuiñajjija quea ca'a nee neeya oya emanoyojaa shequi mee ca o'yanaje. Jamaya ohuaya ojjaña ba mee canaje Jesosa e'e jojo nei oja Bacua Ejja, esejaya Emeshi Mese nei. ⁵Eya Jesosaja epeejji poanijo Eyacuiñajjija eya ojjaña meshi yasijje huoojea canaje jama ba'a: —¡Poquicue miya ojjaña Jodio pojjeama cuana huasijje! ¡Ecuea esohui ba meequivicue Jesosajo! ¡Onijke jjapeequi meesahuacue! Jamajjeya onaaya Jesosa bihuia tiitii caje'yo —jamaya Eyacuiñajjija eya huoojea canaje quea pame nee.

⁶E'e ecuea epeejji cuana Shomajo ba'e, Eyacuiñajjija miquianaya babaca canaje pea cuana nijje Jesosa Quitoja epeejji epojji. ⁷Jamajjeya eyaya miquiana que jiquio esohui tehueña. Miquianaya Eyacuiñajjija quea jea nee nee. Ohuaya miquianaya babaca canaje ojaya epeejji nei epojji.

¡Ejacuiñajjiya esejaya Chii aiya, Jesosa Quitohua esejaya Emeshi Mese neiya miquianaya cajaahuana cahua; quea bei nee caba'e meesahua cahua pea'ai!

Pabo ojaya epeeiji cuana Shomajo ba'ejo Eyacuiñajji nijje mimiani

⁸Ecuea epeeiji cuana Shomajo ba'e, ojjaña meshijo ba'e cuana miquianajo mimiani quea bei Jesosaja esohui jayojja jama ba'yanijo. Ma shajja'ajja majje eyaya Jesosa esejaya Chii ai pea'ai bihuiaña jama ba'a: —Eyacuiñajji, miya quea pame nee. Ojjañaja eba miyaya miquea epeeiji cuana Shomajo ba'e jaahuanaña —eya poani.

⁹Eyaya e'e jojo nei Eyacuiñajjiya esohui quea pame nee oja Bacua Jesosajo huohui tiitiaña quea bihui nee. Ojaya eba eya onijje mimi majamajani miquianajo. ¹⁰Eya jama poani ba'a: —Eyacuiñajji, yahuajo eya poqui sa poanaje Shoma huasijke Jesosaja epeeiji cuana baa. Jamatii poqui mee jjima eya miquea. Eyacuiñajji, ¿a'a jjeya eya Shoma huasijke huoojea sa aña miyaya? —eya jamaya Eyacuiñajji nijje mimi majamajani.

¹¹E'e, eya miquiana ba neinei sa poani Jesosaja epeeiji quea ca'a nee epo meesahua'yojji. Edojoshahua Pameya eya ba mee canaje Eyacuiñajjiya esohui eyacua quea pame. Ma esohui eyacua shajja'ajja majje miquianaya Jesosaja epeeiji quea ca'a nee poaje. ¹²Miquianaaya eya baje Jesosaja epeeiji quea ja'a nee poani. Cuanaya miquianaya Shomajo ba'e Jesosaja epeeiji quea ja'a nee baje eyaya. Jamajjeya Eyacuiñajjiya eseyá ojaya epeeiji cuana quea ja'a nee po meesahua caje'yo.

¹³Ecuea epeeiji cuana, ¡bacue jiquio esohui! Yahuajo eya poqui sa neinei poanaje miquiana baa. Jamatii eya poqui mee jjima, de. E'e, eyaya Jodio pojjeama cuana pea meshi cuanajo ba'e jjapeequi meesahuanaje Jesosa nijje. Jamaya eyaya miquianaya Jesosa nijje jjapeequi meesahua sa aña pea'ai.

¹⁴Ejacuiñajjiya eya huoojea canaje ojaya esohui huohuiya ojjaña cuana huasijke jama ba'a: Ojjaña joya esejaya esohuijo mimiani yasijke, ojjaña pea esohuijo mimiani yasijke pea'ai, ojjaña joya papeni ba po jjima huasijke, joya papeni ba epo cuana huasijke pea'ai, ojjaña huasijke. ¹⁵Jamajjeya eyaya miquiana Shomajo ba'e yasijke Eyacuiñajjiya esohui huohui sa aña.

Jesosa nijje jjapee neineiquianijo mimishi cuijea ca'yani Eyacuiñajjiya

¹⁶;Bacue! E'e jojo nei ojjaña joya Jesosa nijje jjapee neineiquianijo Eyacuiñajjiya mimishi cuana cuijea neinei caje'yo, joya ojaya esohui shajja'ajja majje e'e jojo nei acani. Jamaya ecuea eba. Jamajjeya eyaya bicho'ama ma esohui huohui majamajaña ojjaña cuana huasijke. E'e, Jodio cuaa ma esohui shajja'ajja majje, Jodio pojjeama cuaa shajja'ajja canaje pea'ai. ¹⁷Ejacuiñajjiya esohui quea pame Jesosajo shajja'ajja majje eseyaya Eyacuiñajjiya ejjashahuabquijji baña jama ba'a: —Ojjaña Jesosaja epeeiji nei nei eyaya mimishi cuana cuijea'yo e'e jojo nei epoji. Jesosaja epeeiji pojjeamaja mimishi ecuijea'yojji pojjeama —Eyacuiñajji poani.

Ojjaña Jodio cuana, Jodio pojjeama pea'ai quea mimishi poani

¹⁸ ¡Bacue ecuea esohui ojjañaja mimishi cuanajo! Eyacuiñajji eyajo ba'e quea quene nee nee poaje ojjaña coya mimishi po majamajani nijje. Quea nee nee acaje'yo. Oya cuana aje oe jama poani ba'a: Quea mimishi poani tii, Eyacuiñajji bihuia ajja, mimishi pajea sa po'yo ajja. Eyacuiñajji esohui shajja'ajja sa po ajja, pea cuana esohui shajja'ajja mee ajja pea'ai shajjama' cuana nijje ejjapeequijji jjegojo. ¹⁹E'e, Eyacuiñajjiya ojjaña ba mee ca poa oya quea pame nee, quea ca'a nee enequi tii tii. Jamajjeya ¡Eyacuiñajji ojjañaa caba cahua, de! ²⁰E'e, oya ca ca oe Eyacuiñajji nei quea ca'a nee enequi tii tii. Ohuaya ca ca oe ojjaña pana ca'ya poa. Jamajjeya ojaya epana'yo ba majje joya e'e jojo nei Eyacuiñajji bacue, ojjañaa! Jamatii beca cuana siajje poani jama ba'a: —Esejaya Eyacuiñajji ebajji pojjeama, jjaba meequei ajja, de. ¿Yajja bame yajji eyami ebajjijojo? —poani. ¡A'a jama siajje pomeya pojji!

²¹ E'e de, yahuajo nei ojjañaja eba Eyacuiñajji yani. Jamatii onajaya Eyacuiñajji bihuia jjima jama ba'a: —Eyacuiñajji, miya oe nei quea ca'a nee nee enequi tii tii —jamaya ajjima—. Jamaya Eyacuiñajji, miya quea pame nee nee —ajjima. Oya cuana jamaya jjashahuubaqui jjima, de.

Jamajjeya oya cuana quea quehua jjashahuubaquiani, quea mimishi. Jiquio ecua mecajje quea misi poquiani jayojja jama oya cuana quea mimishi ba'yani, Eyacuiñajji ba pojima!. ²²Ojjaña ba epo poso jjabaquiani. Chojja, ba jjima nei nei quianaja. Quea mimishi nee nee jjashahuubaquiani, ojjaña de. ²³Onaaya aje oe Eyacuiñajji nisho bihuia cani; dejja nisho, cuichojji nisho, aquiana nisho, peyo nisho pea'ai ne cani ebihuiajji. Eyacuiñajji nei ca ca bihuia jjima, de. Eyacuiñajji ca ca oe enequi tii tii quea pame nee nee.

²⁴ Jamajjeya oya cuana quea mimishi ca'a nee nee; jjashajja'ajjaqui aija jojoya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya quea mimishi caba'yahua jamatii. Eyaya oya cuana mimishi pajea meesahua maja ajja —Eyacuiñajji poani.

Jamajjeya cajaa a'yo majje ojjaña ojaya ejjashahuubaquijji tai jayojja jama ca'atiitii cahua cuaa. Pea cuana nijje aje oe quea mimishi nee capoahua. ²⁵ ¡Bacue! Eyacuiñajji e'e jojo nei oe nei yani. Ohuaya ojjaña pana ca'ya poa. ¡Ojjañaa oya cabihuia tiitii cahua! Jamatii joya quea mimishi neeya Eyacuiñajji bihuia pajea cani eyacuiñajji nisho bihuajji. E'e, oya cuana quea jjashahuubaqui quehua poani, de. ²⁶ Jamajoya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya jamatii quea mimishi canequiahua bicho'ama. Ecuea oya emimishi pajea meesahua'yojji pojjeama —Eyacuiñajji poani.

E'e, quea mimishi nee nee ba'yani bicho'ama. Eyacuiñajjiya esohui jama ba'e ajja. Epona cuana aje oe pea epona nijje quea mimishi nee poani, ojahue nisho acani, jjaso cojjoquiani. Pea cojjojji pea'ai poani. ²⁷ Dejja cuana pea'ai aje jjaja oe jamaya quea mimishi epona jayojjaya po pea'ai yani. Ehuanase jea majje epona nijje pojjeama jaani, pea dejja nijje quea mimishi ba'yani. Onijje dejja

nijje jjaseehuejja cojjoquiani. Jamajjeya jjashajja'ajjaqui aija jojoya Eyacuiñajjiya oya cuana cajaa acani. Ca'l'ama poani, quea jjashahuabaqui tai poani pea'ai.

²⁸Eyacuiñajjiya epana'yo ojaya eba. Jamatii oya cuana jama poani ba'a: —E'e pojja'a Eyacuiñajji e'e jojo nei yani. Jamatii ¿apiojji acuae oya shajja'ajja cajji so'o? Cajaa —oya cuana poani.

Jamajjeya Eyacuiñajjiya oya cuana jama acani ba'a: —Oya cuana ca ca oe quea jjashahuabaqui tai po tiitiiani; quea mimishi ba'yani tii bicho'ama jjejojo. Jamatii quea tai caba'yahua —Eyacuiñajji poani.

²⁹Jamajjeya ojjaña cuana quea mimishi nee nee poani tii tii. E'e, quea mimishi ba'yani, quea dejja tai, quea nishehui, onaja aquiana jea ba cani, pea cuana boti'ama nei nei poani, ona mimishi po meeiji peal'ai poani. ³⁰Pea quecuajji poani, jjamimicuajea nobiaeajquiji poani, jjadasiaquiji poani, ojaya epeejji iñameejji poani equecua mee'yojji, mimijajiji poani, pea cuanajo maimaijji, Eyacuiñajji cajaa acani, pea cuana jeabichajeajji poani, pea nijje mimi aija peal'ai. Oya mimiani ojaya ejjashahuubaquijji poa cuana quea bihui po meeiji nisho, jjashahuuba tiittiuiquiani mimishi ya'yojji. Oja chii, oja nae shajja'ajja sa po aija pea'ai. ³¹Jjashahuubaquii aija, mimishi cuana quea pame poso acani, ojaya ehuohui jama a'ajja pea'ai. Huapa pojjeama cuana boti'ama acani, pea cuana quea nee po mee sa acani; pea quea nee, quea yeno po mee majje yeno'ama poani. ³²Dejja quea mimishija eba Eyacuiñajjiya esohui etehue'yo e'e nei jama poani ba'a: "Ojjaña joya quea mimishi poani quea nee nee poaje'yo. Mano'yo majje cuaqui yasijje poquije'yo. Enijje eyajo enequi'yojji pojjeama tii tii" Eyacuiñajji poani.

Maya ojjaña mimishi cuanaja eba. Jamatii shajjama' poani tii tii. Pea cuana aje oe quea mimishi po mee cani jama ba'a: —E'e, ocuee. ¡Jamaya a'ajja! —bihuia nisho cani.

Eyacuiñajjiya ca ca oeyaya huohui caje joya mimishi'amajo, joya quea mimishijo pea'ai

2 ¹Ecuea epeejji cuana, ¿a'a miquianaya jjashahuubaquiani miya ca ca oe quea pame, ma dejja mimishi cuana jama pojjeama? ¡A'a pea cuana jama ajji ba'a: —Oya cuana quea mimishi nee poani. ¡Quea nee nee capo mee cahua Eyacuiñajjiya! —a'a jamaya mimijji!

¡Dee! Miquianaaya beca cuaa ona jayojja jama quea mimishi aña pea'ai. Jamajjeya Eyacuiñajjiya miquianaya quea nee nee po mee caje'yo ona jayojjaya. ²Ecuanaja eba Eyacuiñajjiya ejjashahuubaquijji e'e nei, ojjaña ojaya eba. Jamajjeya ojjaña joya quea mimishi ba'yani ohuaya quea nee nee po mee caje'yo, Jodio cuana, Jodio pojjeama cuana pea'ai, ojjaña nei nei. ³Miya quea mimishi poanijo ¡a'a jjashahuubaquijji jama ba'a: —Eyacuiñajjiya pea cuana quea nee nee po mee caje'yo shajjama' poani jojoya. Eya ca iña cho, quea nee epo meeiji pojjeama —a'a jamaya pojji! ¡Dee! Miya quea mimishi poani ona jayojja. Jamajjeya Eyacuiñajjiya miya quea nee nee po mee caje'yo ona nijje. Miya ojaya eba, de,

ejjanequiquehuaquijji pojjeama miya. ⁴E'e pojja'a miya quea quehua jjashahuabaquiani jama ba'a: —Eyacuiñajji ojjaña nijje quea pame nee poani. Quenequene cuaji ajja. Joya ojaya esohui jama ba'e ajja jamatii quea nee nee epo meeiji pojjeama. Jamajjeya eya quea mimishi po tiitianijo, jamatii ojaya eya etecueajji pojjeama —poso jjabaquiani miya.

Chojja. Miya aje oe jjashahuabaquiani quea quehua nee. ¿A'a miquea ba jjima? Eyacuiñajji ojjaña nijje quea pame poani, ishoa cani emimishi pajea meesahua'yojji. ⁵Jamajjeya miya quea mimishi nee nee jjejojo, shajjama' poani tiitijo, Eyacuiñajjiya miya quea nee nee po mee caje'yo. E'e, quijje ohuaya ojjaña shajjama' poani tecuea neinei caje'yo. ⁶E'e jojo nei Eyacuiñajjiya ojjaña eseaya sosequia caje'yo ma eseaya aninaje sosejje. Ojaya epeejji quea pame quea bihui nee po mee caje'yo. Shajjama' cuana ca ca quea nee nee po mee caje'yo ma o quea mimishi ponequinaje sosejje. ⁷Jamajjeya beca cuana Eyacuiñajjiya esohui jama quea pame nee poani Jesosaja ejjashahuabaquijji jayojja epojji, o jayojja jama epojji, onijje eba'e tiiti'yojji. Eyacuiñajji quea bihui nee po mee sa acani. Jamajjeya Eyacuiñajjiya oya cuana bihuia caje jama ba'a: —E'e, miquianaya ecuea epeejji quea pame nee. Jamajjeya miquianaya enijje ba'e tiiti'yo eyajo.

⁸Pea cuana ca ca Eyacuiñajjiya esohui e'e nei jama ba'e sa po'yo ajja. Cajaa acani. Shajjama' poani. Jamajjeya Eyacuiñajji onijje quea quene tii tii poaje'yo. Quea nee nee po mee caje'yo. ⁹E'e, Jodio cuana, Jodio pojjeama cuana pea'ai Eyacuiñajjiya ojjaña quea yeno nee, quea nee nee po mee caje'yo shajjamajojo. ¹⁰Joya ojaya esohui jayojja jama quea pame poani ca ca Eyacuiñajjiya huohui caje jama ba'a: —E'e jamaya, miya quea pame poani. ¡Jamajjeya quea pame, quea bei ba'ecue! ¡Enijje ba'e tiitiuce eyajo! ¡Enijje ojjaña huoojeajji pocue! —oya cuana acaje.

E'e, Jodio cuana jamaya acaje Eyacuiñajjiya, Jodio pojjeama cuana pea'ai. ¹¹Ojjañajo Eyacuiñajji e'e jojo nei jjashahuabaquiani. Esejaya eba'ejjijo jjashahuabaquiani esosequia'yojji.

Eyacuiñajjiya ehuohui shajjama' cuanajo e'e nei

¹²Jodio pojjeama cuanaja ba jjima poa Eyacuiñajjiya esohui ma Moisesiya tehue ca poa. Jamatii oya cuana quea nee nee po mee caje'yo Eyacuiñajjiya quea mimishi ba'yanijo.

Jodio cuua ca ca Moisesija etehue'yo ba canaje. Jamajjeya shajjama' poanijo, Eyacuiñajjiya oya cuana tecuea caje jama ba'a: —Miquianaya ca mi ca shajjama'. Moisesija etehue'yo bajji poani, jamatii jamaya a'ajja. Jamajjeya ma etehue'yojo tehue ca poa jayojja jama miquianaya quea nee nee poaje'yo —Eyacuiñajji poani.

¹³Moisesija etehue'yo Eyacuiñajjiya esohui ba majje jamatii Jodio cuana shajjama' poani. Jamajjeya ojaya mimishi cuana ecujea'yojji pojjeama. Ojaya esohui jama acani ca ca oe Eyacuiñajjiya mimishi cuana cuijea caje'yo Jodio cuanaja. ¹⁴Jodio pojjeama cuanaja ba jjima Eyacuiñajjiya esohui Moisesija etehue'yo. Jamatii oya cuana ma esohui jayojja jama ba'yani beca cuana. E'e, quea ja'a nee jjashahuabaquiani. Jamaya ojaya eba quea pame eba'ejji. Ojaya

eba eba'ejji quea tai pea'ai. E'e, Moisesija etehue'yo Jodio pojjeama cuanaja ba jjima nei. ¹⁵ Jamatii, Eyacuiñajjiya oya cuana ba meesahua cani ojaya ejjashahuabaquijji'yojji. Jamajjeya oya cuana oja mimishijo jama poani ba'a: —Chojja, jamaya Eyacuiñajjiya boti'ama. Eya shajjama' jayojja poani.

Joya quea pame ba'yani jama poani ba'a: —E'e, jamaya quea pame eba'ejji. Jamaya Eyacuiñajjiya quea boti nee —oya cuana poani.

¹⁶ E'e, Eyacuiñajjiya eba ojjañaja ejjashahuabaquijji cuana. Jamajjeya quijje ohuaya e'e jojo nei huohui caje'yo ojjañaja eba'ejjijo. Ohuaya Jesosa huoojea caje jama ba'a: —Jesosa, joya cuana sosequiacue ma ohua meshijo ba'yahuua acanaje sosejje! —Eyacuiñajjiya acaje'yo.

Jamaya eyaya, Pabohua huohuiaña ojjaña esohui quea pame nee Jesosajo.

Jodio cuana Moisesija etehue'yo ba majje jamatii shajjama' poani

¹⁷ Jodio cuana, miquianaya mimi huicha'a huicha'ani jama ba'a: —Ecuana ca ca oe Jodio cuana, Eyacuiñajjiya babaca ojaya nei epoiji. Ohuaya ecuana ojaya esohui ba mee ca poa Moisesija etehue'yo. Jamajjeya ohuaya ecuana ba cani mimishi'ama —miquianaya poani—. ¹⁸ E'e, ecuaaya baña Eyacuiñajjiya esohui Moisesija etehue'yo. Jamajjeya ecuanajaya eba Eyacuiñajjiya ejjashahuabaquijji'yojji. Jamajjeya ecuana ba'yani quea pame nee, mimishi'ama —miquianaya poani.

¹⁹ Jamajjeya miquianaya jama poani pea'ai ba'a: —Jodio pojjeama cuana, Eyacuiñajjiya esohui ecuanajaya eba nei nei Jodioja jjejojo. ¡Ecuana jayojjaya oe pocue! —miquianaaya aña—. Ecuaaya Eyacuiñajjiya esohui baña Jodiohua jjejojo. Jamajjeya ecuanaya cuaquijji jayojja jama poani. Jiquio ecua mecajje quea misijo cuaquijjiya ejiojji ba mee cani jayojja jama ecuaaya joya Eyacuiñajji ba pojshima' cuana quea ja'a nee ba'e meesahuaña. ²⁰ E'e, joya Eyacuiñajji ba pojshima' cuana, Eyacuiñajji oe pojji ba epo pea'ai ecuaaya esohui ba meesahuaña. Eyacuiñajjiya ecuana ojaya esohui etehue'yo ba mee ca poa. Ma esohui e'e jojo nei —jamaya miquianaaya aña.

²¹ Miquianaaya pea cuana esohui huohui huicha'a huicha'aña. Jamatii miquea ehuohui jayojja jama ba'e ajja miquianaya. E'e, jama huohuime aña ba'a: —¡A'a jja oe sii pojji!

Jamajjeya ¿apiojji acuae jja oe miya sii poani?

²² —¡A'a pea cojjojji! —huohui aña miyaya.

Jamajjeya ¿apiojji acuae jja oe miya pea cojjojji poani so'o?

—¡A'a eyacuiñajji nisho bihuiajji oe! —huohuime aña.

¿Apiojji acuae jja nequiaa oe Eyacuiñajji bihuia nishoaña quea aquiana jeaa jjejojo?

²³ Miquianaya mimi huicha'a huicha'ani Moisesija etehue'yojo: —Ecuana ca jja ca oe Eyacuiñajjiya ojaya esohui etehue'yo ba mee ca poa —ca jja nequiaa ca oe poani.

Jamajjeya apiojji shai miquianaya onijje jjapee nishoquiani, ojaya esohui jayojja jama ba'e tiitii ajja. ²⁴E'e, yahuajo nei Eyacuiñajjija etehue'yo jama poa ba'a:

“Jodio cuana, miquianaya ca jja ca oe shajjama' ba'yani. Mi ba majje Jodio pojjeama cuaa Eyacuiñajji cajaa acani”.

Jamaya Eyacuiñajjija esohui yahuajo nei etehue'yo poa.

**Cuiishasha biso nei jehuisejjajea majje pojjeama
eseya Eyacuiñajjija epeejji nei poani**

²⁵Jodio cuana, yahuajo nei esejaya etiiquianaa Moisesiya Eyacuiñajjija esohui tehue ca poa jama ba'a: —¡Mique bacuaja cuiishasha biso nei jehuisejjajeacue!

Jamaya eseyaya aña, Eyacuiñajjija esohui yahuajo nei jayojjaya aña. Jamajjeya Eyacuiñajjija etehue'yo jayojja jama quea pame nee ba'yanijo cuiishasha ejehuisejjajea'yo quea pame. Jamaya ojjaña ba meeña eseya, Jodio cuana Eyacuiñajjija babaca'yo o peeiji epoji. Jamatii Eyacuiñajjija esohui etehue'yo jayojja jama ba'e ajja ca ca ¿apiojji acuae cuiishasha biso nei jehuisejjajeaña so'o? Jamatii Eyacuiñajjija miquianaya ba cani Jodio pojjeama jayojjaya quea mimishi pealaiya. ²⁶Jodio pojjeamaa ca ca cuiishasha jehuisejjajea ajja. Jamaya po ajja oya cuana. Jamatii beca cuana Eyacuiñajjija esohui etehue'yo quea ja'a nee jayojja jama ba'yani. Jamajjeya Eyacuiñajji oya cuana ba cani Jodio jayojjaya, ojaya ebabaca'yo, jamatii cuiishasha jehuisejjajea jjima. ²⁷Jodio cuana, miquianajaya eba Eyacuiñajjija esohui. Cuiishasha jehuisejjajeaña pealai. Jamatii aje oe Eyacuiñajjija esohui etehue'yo jayojja jama ba'e ajja. Jamajjeya Eyacuiñajji miquianaya ba cani shajjama!. Jodio pojjeamaa ca ca cuiishasha jehuisejjajea ajja. Jamatii Eyacuiñajjija esohui jayojja jama ba'yanijo, ohuaya oya cuana ba cani mimishi'ama, quea pame. ²⁸E'e, eseya Eyacuiñajjija esohui jayojja jama ba'yanijo ojaya epeejji nei poani, cuiishasha jehuisejjajea majje pojjeama. ¿A'l miquianaya cuiishasha jehuisejjajeaña? ¿A'l mimishi pajea'yonaje pealai? ²⁹Eyacuiñajjija esohui jayojja jama añajo ca ca miquianaya ojaya epeejji nei poani. Beca cuanaja cuiishasha jehuisejjajea jjima; jamatii Edojjashahua Pameya pea jjashahuabaquime po mee ca'yani Jesosaja epeejji nei epoji. Jamajjeya miquianaya Jesosaja epeejji e'e jojo nei poani. Pea cuaa pojja'a miquianaya Jesosaja epeejji pojjeama poso acani, miquea cuiishasha jehuisejjajea jjimajojo. Jamatii Eyacuiñajjija eba miquianaya ojaya epeejji nei poani.

Jamajjeya ojjaña joya Eyacuiñajjija esohui jayojja jama ba'yani ojaya epeejji nei poani, Jodio cuana, Jodio pojjeama cuana pea'ai, ecuuishasha jehuisejjajea'yo cuana, ecuuishasha jehuisejjajea'yo pojjeama cuana pea'ai.

Eyacuiñajji e'e jojo nei, quea ja'a nee nee poani

3 ¹Jodio cuana, ¿a'l miquianaya jjashahuabaquiani? Jama ba'a:

—Eyacuiñajjiya Jodio pojjeama cuana ojaya epeejji nei po mee cani ecuana jayojjaya. Jamajjeya ¿apiojji acuae etiiquianaja ehuohui'yo jayojja

jama cuiishasha jehuisejjajeaña? ¿A'a Jodio pojjeama epoji quea pame nee nee, Jodio epoji quea pame pishana? —miquianaya pojja'a jamaya poani.

²Quea pame nee Jodio epoji. ¡Bacue! Eyacuiñajjiya eseya Jodio cuana yahuajo nei nei ojaya esohui etehue'yo ba mee ca poa, ba majje pea cuana huasijje ehuohui'yojji pealai. ³E'e, Eyacuiñajjiya esejaya etiiquiana Amajama bajjani huohui ca poa jama ba'a: —Eyaya mique osecua cuana quijje nei nei ba'eje quea pame nee nee aje'yo; ecuea esohui quea pame jayojja jama aje'yo —Eyacuiñajji poa.

—Esejaya etiiquiana Eyacuiñajjiya esohuijo shajjama' poajo, ¿a'a Eyacuiñajjiya ojaya esohui pajea caje'yo pojja'a? ¿A'a jamaya yajji pojjeama pojja'a? —miquianaya poani pojja'a.

⁴¡Chojja de! Dejja cuana siajje poani, ojjaña. Eyacuiñajji ca ca siajje po ajja nei nei. Ma ecua ohua huohui canaje jayojjaya ohuaya acaje'yo. Ojaya esohui yahuajo nei etehue'yo jama poa ba'a:

“Eyacuiñajji, miyaya ca ca oe esohui e'e nei huohuaña tii tii. Miquea ejjashahuabaqui'yojji ba majje ojjañaa ba caje miya e'e jojo nei poani, siajje po ajja nei nei”.

Jamaya Eyacuiñajjiya esohui yahuajo nei tehue ca poa.

⁵Jodio cuana, miquianaya jjashahuabaquiani quea quehua, de; jamaya poso nequiana jjabaquiani ba'a: —Ecuana quea mimishi poanijo, ojjañaa Eyacuiñajji bihuia caje jama ba'a: “Eyacuiñajji oe nei quea ja'a nee poani, oe nei quea pame”. Jamajjeya ¿apiojji shai Eyacuiñajjiya ecuana quea nee nee po mee caje'yo quea mimishi poanijo? —jamaya miquianaya Eyacuiñajji ba po jjima jayojja jama jjashahuabaquiani, quea quehua.

⁶Chojja Jodio cuana, jamaya pojjeama. Jamaya e'e nei poa jojjemo Eyacuiñajjiya mimishi cuana tecuea jjima aca'yome. Eyacuiñajjiya e'e nei nei acani tii tii. E'e jojo nei ojjaña shajjama' cuana ohuaya quea nee nee po mee caje'yo mimishi poani sosejje. ⁷Jamatii miquianaya quea quehua jjashahuabaquiani jama pea'ai ba'a: —E siajje poanijo pea cuaa Eyacuiñajji bihuia cani jama ba'a: “Eyacuiñajji oe nei siajje po ajja nei nei” acaje cuaa. Jamajjeya ¿apiojji shai Eyacuiñajjiya eya quea nee nee po mee caje'yo siajje poanijo? —miquianaya aje jja oe jamaya poani.

⁸Cho, jamaya pojjeama. Jamaya e'e nei poa jojjemo, ca ca e siajje poanijo pea cuaa Eyacuiñajji bihuia cani ecuana siajjepoji pome. E'e, beca cuaa aje oe eya niñebla cani jama ba'a: —Pabohua aje jja oe jamaya huohui cani ba'a: “¡Quea mimishi oe pocue pea cuana quea pame nee eba'e meesahuajjl!” —onaaya jama eya niñebamaya acani. Cho, eya jamaya po ajja. ¡Jamaya niñebla canijo, Eyacuiñajjiya oya cuana quea nee nee capo mee cahua, de!

Eyacuiñajjiya ojjaña cuana ba cani shajjama' jayojja

⁹Jodio pojjeama cuana shajjama' nei nei poani. ¿A'a Jodio cuana shajjama' pishana? Chojja, Jodio cuana Jodio pojjeama cuana jayojjaya

jama poani. Ojjaña shajjama' nei nei pea'ai poani. ¹⁰Eyacuiñajjiya esohui yahuajo nei nei Dabiya tehue ca poa jama ba'a:

“Ecuea esohui jayojja jama a'ajja ojjaña cuaa. Chama' joya quea pame poani. ¹¹Ecuea esohui e'e nei ba sa po ajjajo ojaya ba jjima ecuea ejjashahuabaqui'yojji. Oya cuana e ba sa po'yo ajja pea'ai. ¹²Chojja, oya cuana eshahua nijje poani, enijje jjapeequi ajja quea mimishi jjejojo. Shajjama' jjejojo quea pame po ajja ojjaña cuana. ¹³Ojjañaa esohui quea tai nee nee acani. Quea tai nee nee ojjañaja esohui, aquiana quea ihui jayojja. Ojjaña siajjepoiji pea'ai, siajje popajea'yo ajja pea'ai. Ojjaña mimijajiji poani pea'ai. Quea tai nee nee ojjaña poani. Jiquio ecua peyo se naa quea nee nee po mee cani jayojja jama ojjaña cuaa onaya quea yeno po mee cani. ¹⁴Ojjaña quea tecue nee nee poani, panajajiani pea'ai. ¹⁵Oya cuana quenequene cuaji majje jjaquecuaquiani. ¹⁶Oya cuana aje oe ona quea mimishi pomeejji poani; ojjaña quea yeno nee nee po mee cani. ¹⁷Ojjaña quea bei ba'e ajja tii tii. ¹⁸Ejo jjashahuabaqui ajja tii tii, jjashajja'ajjaqui ajja pea'ai”.

Jamaya Eyacuiñajjiya yahuajo nei tehue mee ca poa.

¹⁹Jamatii esejaya eba Jodio cuana jama siajje poani ba'a:

—Ejacuiñajjiya esohui Moisesija etehue'yo jayojja jama ecuanaaya aña.

Jamatii Eyacuiñajjiya Jodio cuana jama acani ba'a: —Miquianaya aje oe ecuea esohui ba majje jama a'ajja. Shajja huejjama' jayojja miquianaya poani.

Jamajjeya Eyacuiñajjiya ojjaña cuana quea nee nee po mee caje'yo; Jodio cuana, Jodio pojjeama cuana pea'ai quea jeca poaje'yo, quea mete poaje'yo shajjama' poani jjejojo.

²⁰E'e, Ejacuiñajjiya esohui Moisesija etehue'yo ba majje ojjaña cuana jama poaje ba'a: —E'e, eya shajjama' jayojja jama poani —ojjaña poaje.

Jamajjeya Ejacuiñajji ojjaña nijje mimi ajja jama ba'a: —Miquianaaya ecuea esohui etehue'yo jayojja jama e'e jojo nei aña. Jamajjeya miya quea pame nee nee —jamaya mimi ajja Ejacuiñajji. Chojja, ojjaña shajjama' poani, ojjaña tii.

Jesosa nijje e'e jojo nei jjapeequianijo Ejacuiñajjiya esejaya mimishi cuijea caje'yo

²¹Yahuajo nei nei Ejacuiñajjiya esohui huohuijjiya, Moisesiya pea'ai jama sohuihuohuime aca poa ba'a: “Ojjaña joya e'e jojo nei onijje jjapeequianijo Ejacuiñajjiya quea bojea po mee caje'yo” yahuajo jama huohuimeya aca poa. Matii ojjaña jjashahuabaquinaje Ejacuiñajjiya ojjañaja mimishi cuijea caje'yo Moisesija esohui etehue'yo jayojja jama añajo poso. ²²E'e, Ejacuiñajjiya esejaya mimishi cuana cuijea cani jama huohuime amajje ba'a: —Ecuea eba Jesosa Quitohua ecuea mimishi cuijea caje'yo. Eya onijje jjapeequije'yo.

E'e, Jodio cuana Jodio pojjeama jayojjaya jama acaje'yo Ejacuiñajjiya. ²³Ojjaña cuana ojjaña meshijo ba'e quea mimishi nee poani. Jamajjeya Ejacuiñajji ojjaña cuana nijje quea bihui pojjeama, o jayojja jama po ajjajojo. ²⁴Jamatii Ejacuiñajji

quea pame nee nee. Ojjaña quea jea nee acanijo ojjaña shajjama' cuanaja mimishi cuijea'yo majje ojjaña ba cani mimishi'ama. Jamaya Eyacuiñajjiya acani Jesosa Quito ojjaña cuanaja mimishi cuijea'yojji sosejje mano'yonajejo. ²⁵E'e, Jesosa Quito esejaya mimishijo mano'yonaje; ojaya ena' cuayaquinaje. Jamajjeya ojjaña eseya jama mimianijo ba'a: —Jesosa Quito mano'yonaje ecuea mimishijo —jamaya poanijo, Eyacuiñajjiya esejaya mimishi cuijea'yo majje eseya ba cani mimishi'ama.

E'e, Eyacuiñajjiya Jesosa ba ca poa ñajjajja equecua'yo jayojja, ma ona mimishi cuana nijje quea bei nee epojji. Eyacuiñajjiya oya Jesosa Quito mano mee ca'ya poajo, ojjaña ba mee cani oya e'e jojo nei quea pame poani. Eyacuiñajji jama poani ba'a: —Mimishi cuana sosequia'yojji oe dejja camanoqui'yahua.

Yahuajo nei nei Jesosa mano'yo jjimahuajo ojjaña cuana shajjama' poa. Jamatii Eyacuiñajjiya ishoa canaje; mimishi cuijea'yo jjima acanaje Jesosa mano'yo jjimahuajo. Jamajjeya Jesosa mano'yo jjimahuajo, dejja mimishi cuana jjashahuuba quehuaqui canaje jama ba'a: —Eyacuiñajjiya pajea ca'yonaje ecuanajaya mimishi cuana jamatii pojja'a —poanaje.

Jjeya ca ca Jesosa Quito mano'yonaje mimishi cuijea'yojji sosejje. Jamajjeya Jesosa mano'yajo, Eyacuiñajjiya ojjaña ba mee cani ohuaya jamatii pojjeama etiiquianaja mimishi pajea ca'yonaje. ²⁶Jjeya pealai Eyacuiñajjiya esejaya mimishi cuana cuijea ca'yani Jesosa nijje jjapeequianijo. Jamajjeya ohuaya ojjaña ba mee cani oya quea pame nee nee poanijo Jesosaja epeejji cuanaja mimishi cuana cuijea ca'yani. Eyacuiñajji jama poani ba'a: —Jesosa miquea mimishijo mano'yonajejo, eyaya miquianaya baña mimishi'ama —Eyacuiñajji poani.

Jesosa nijje jjapeequianijo ca ca oe Eyacuiñajjiya eseaya ba cani emimishi cuijea'yo

²⁷Eseya jama po ajja ba'a: —Eyaya ca eya Moisesija etehueya jayojja jama añajo, Eyacuiñajjiya eya mimishi cuijea ca'yonaje —eseya jamaya po ca ajja nei nei. ²⁸Jamajjeya esejaya eba jama ba'a: Jesosaja epeejji nei poanijo ca ca oe Eyacuiñajjiya eseya ba cani emimishi cuijea'yo, quea pame. Jamajjeya Moisesija etehue'yo jayojja jama ba'yanijo pojjeama mimishi cuijea ca'yani Eyacuiñajjiya. Chojja, shajjama' ojjaña poani; chama' joya Moisesija etehue'yo jayojja jama ba'yanii tii.

²⁹Jodio cuana, eyaya miquianaya huohui'ajjaña jama ba'a: —¿A'a Eyacuiñajjiya Jodio cuanaja mimishi cuijea cani, Jodio pojjeama cuanaja mimishi cuijea sa po ajja pojja'a?

Chojja. Jamaya pojjeama. Eyacuiñajjiya ojjañaja mimishi cuijea cani Jesosa nijje jjapeequianijo. ³⁰Ohuaya ojjaña acani oya jayojjaya Jodio cuana, Jodio pojjeama cuana pealai. Jamajjeya Jesosa nijje jjapeequianijo, Eyacuiñajjiya eseya ba cani emimishi cuijea'yo, Jodio pojjeama cuana pealai, de. ³¹Jamajjeya eseya, Jodio cuana Jesosa nijje jjapeequianijo, ¿a'a Eyacuiñajjiya esohui etehue'yo jayojja jama ca'apaje'yahua? Chojja de. Jesosaja epeejji poanijo ca ca eseyaya ojaya esohui jayojja jama ejja'aqui o quea bihui nee epo meeiji.

Onijje jjapeequianijojo Eyacuiñajjiya Amajamaja mimishi cuijea ca'yonaje

4 ¹ ¡Jashahuabaquicue Amajamajo, esejaya etiiquianajo, ma ojjaña Jodio cuanaja etiiquianajo! ¿Yajjajo shai Eyacuiñajjiya oya huohui ca poa so'o? Jama ba'a: —Amajama, eyaya miya baña emimishi cuijea'yo, ecuea epeejji nei. ²A'a Eyacuiñajjiya jamaya aca poa Amajama ojaya esohui etehue'yo jayojja jama ba'ya poajo? ³Chojja. Eyacuiñajjiya Amajamaja mimishi cuijea ca'ya poa ojaya esohui etehue'yo jayojja jama ba'ya poajo poso miquiaaya aña. Chojja. Eyacuiñajjiya Amajama jama aca poa ojaya esohui etehui'yo joyajja jama ba'ya poa jojjemo Amajama jama mimime poquiaye ba'a: —Eya ca ca iña quea pame nee, de. Ojjaña Eyacuiñajjiya esohui etehue'yo jayojja añajo, ohuaya ecue mimishi cuijea ca'yonaje —Amajama jama mimimeya poquiaye.

¡Dee! Becca cuana jamaya jjashahuaba quehuaquiani. Eyacuiñajji ca ca jamaya jjashahuabaqui ajja. ⁴Ojaya esohui yahuajo etehue'yo jama poa ba'a: —Amajama Eyacuiñajji nijje jjapeequia poa. Jamajjeya Eyacuiñajjiya oya jama aca poa ba'a: “Amajama, eyaya miya baña emimishi cuijea'yo” aca poa —jamaya esohui yahuajo nei etehue'yo poa, Eyacuiñajjiya.

⁴ ¡Bacue! Dejja chacochacoajo, casosequia cahua echacomeejjiya.

Echacomeejjiya sosequia cani jamatii pojjeama, chaco sosejje, de.

⁵ Eyacuiñajjiya ca ca esejaya mimishi cuana cuijea cani etehue'yo jayojja jama ba'yanijo sosejje pojjeama. Chojja. Jesosa nijje jjapeequianijo, ohuaya eseya ba cani emimishi cuijea'yo jamatii. E'e, oya shajjama' nei nei cuana ba cani mimishi'ama pea'ai Jesosa nijje mimi jeahuajo, onijje jjapeequi jeahuajo pea'ai. ⁶Maya esejaya etiiquiana Dabi bajjanija eba poa. Jamajjeya jama jjashahuabaquimeya poa ba'a: “Eyacuiñajjiya eseya ba cani emimishi cuijea'yo. Ojaya esohui etehue'yo jayojja jama ba'yanijo sosejje pojjeama. Eyacuiñajjiya eseya ba cani emimishi cuijea'yo. Quea bihui nee capoahua mimishi cuijea ca'yajje”. ⁷Jamaya Dabiya yahuajo nei tehue ca poa ba'a:

“Eyacuiñajjiya oja mimishi cuijea cajo, quea bihui nee capoahua ojjaña shajjama' cuana. Quea bojea'yo po mee canijo, quea bihui nee nee capoahua. ⁸Shajjama' cuana quea bihui nee capo'yahua Eyacuiñajjiya oya shajjama' pojjeama ba canijo, de”.

Jamaya esejaya etiiquiaa Dabiya tehue ca poa yahuajo nei.

⁹ ¡A'a ohuaya maya tehue ca poa Jodio ca ca oe mimishi jamatii cuijea cajo quea bihui poaje? Chojja. Jodio pojjeama pea'ai quea bihui poaje mimishi jamatii cuijea ca'yajje. E'e, Eyacuiñajjiya esohui etehue'yo jama poa pea'ai ba'a: “Onijje jjapeequianijo, Eyacuiñajjiya Amajama ba ca poa emimishi cuijea'yo” anaje. (Amajama ba'eya poa Moisesi cuaya jjimahuajo.) ¹⁰ ¡Ache shono acuae Eyacuiñajjiya Amajama ba ca poa emimishi cuijea'yo? ¡A'a cuiishasha biso nei jehuisejjajea cajo pojja'a? ¡A'a jehuisejjajea jjimahuajo pojja'a oya emimishi cuijea'yo ba ca poa, Eyacuiñajjiya? ¹¹Cuiishasha jehuisejjajea jjimahuajo ca jja ca oe Eyacuiñajjiya Amajama ba ca poa emimishi cuijea'yo. Jamajjeya ¿yajjajo shai

jehuisejjajea mee ca poa? Jama ba'a: Quije Amajamaa jamaya aca poa onajaya ebajji oya Eyacuiñajji nijje jjapeequianijo ca ca oe ohuaya oya emimishi cuijea'yo ba ca'ya poa, cuiishasha jehuisejjajea jjimahuajo. Jamajjeya oya jayojjaya Jodio cuana, Jodio pojjeama cuana pea'ai Jesosa nijje jjapeequianijojo Eyacuiñajjiya eseya ba cani quea boejea'yo, cuiishasha ejehuisejjajea'yo pojjeamajo, de.

Jamajjeya Amajama Jodio pojjeama cuanaja etiiquiana jayojja jama esejaya pea'ai, ca Jesosaja epeejji poanija.¹² Oya Amajama esejaya, Jodio cuanaja etiiquiana poa. Jamajjeya Amajamaa jayojja jama cuiishasha jehuisejjajeaña eseyaya, Jodio cuaaya. Amajama Eyacuiñajji nijje jjapeequia poa cuiishasha jehuisejjajea jjimahuajo. Jamajjeya Jodio cuana jjeya Amajamaja osecua nei poani Jesosa nijje jjapeequiani jojoya, cuiishasha jehuisejjajea majje pojjeama.

Eyacuiñajjiya ojaya esohui jayojja jama acaje'yo esejo, onijje jjapeequiajо

¹³E'e, yahuajo nei onijje jjapeequianijo Eyacuiñajjiya Amajama ba ca poa mimishi'ama. Ojaya ehuohui'yo jayojja jama po jjimahuajo ca ca Eyacuiñajjiya Amajamaja mimishi cuijea ca'ya poa. Jamajjeya Eyacuiñajjiya Amajama huohui ca poa jama ba'a: "Amajama, eyaya miya, mique osecua cuana pea'ai emeshi mese po meeaña ojjaña meshi yasijke" Eyacuiñajjiya jamaya aca poa Amajama onijje jjapeequianijojo.¹⁴ Jamajjeya ojjaña Moisesija etehue'yo aiji poani oe nei eyajo eba'e tiitii mee'yojji jojjemo eseya Jesosaja epeejji cuana eyajo ba'e tiitii'yo jjima pome, Eyacuiñajjiya ma Amajama nijje ohua huohui ca poa jama a'lajji pojjeama pome pea'ai.¹⁵ E'e, Moisesija etehue'yo jama a'lajjajo, Eyacuiñajjiya quea nee nee po mee caje'yo shajjama' cuana. Jamatii Eyacuiñajjiya esohui ba mee jjima jojjemo shajjama' cuana chama' pome. Chama' joya esohui etehue'yo jayojja jama ba'yani.

¹⁶ Jamajjeya Eyacuiñajjiya quea pame huohui ca poa ojjaña onijje jjapeequianijo. Eseya ojaya quea jea nee nee. Oya siajje po ajja nei nei pea'ai. Jamajjeya ma ohua Amajama nijje huohui ca poa jayojja jama ohuaya acaje'yo e'e jojo nei Amajamaja osecua cuana nijje. E'e, ohuaya jamaya acaje ojjaña ese nijje, Jesosa nijje jjapeequianijo; Jodio cuana nijje, Jodio pojjeama cuana nijje pea'ai. E'e, Jesosa nijje jjapeequianijo eseya Amajama jayojja, Eyacuiñajjiya epeejji nei nei ma ecua Amajama poa jamaya eseya. Jamaya Eyacuiñajjiya ojjaña eseya ba cani Amajamaja osecua cuana.¹⁷ Eyacuiñajjiya esohui ma ohua Amajama huohui ca poa ohuaya yahuajo nei tehue mee ca poa jama ba'a: "Amajama, eyaya miya ojjaña dejja cuanaja, pea jaajjija esohui mimianija etiiquiana po meeje'yo, ojjaña etiiquiana". Jamaya Eyacuiñajjiya yahuajo nei tehue mee ca poa ojjaña ojaya epeejji cuanaja. Jamajjeya onijje jjapeequianijo, Eyacuiñajjiya eseya Amajamaja osecua cuana po mee cani. E'e, ohuaya quea ca'a nee nee, ojjaña acani. Emano'yo cuana shequi mee ca'yani; ojjaña aquiana ma yahuajo chama' poa ohuaya pana cani, Eyacuiñajjiya.

¹⁸ Jamajjeya Amajama tii nojinojil'ya poa bacuama' tii. Jamatii Eyacuiñajjiya oya huohui ca poa jama ba'a: "Amajama, miquea osecua cuana quea huiso nee nee poaje. Emeshi mese cuana poaje'yo ojjaña meshi cuana

huasijje” jamaya Eyacuiñajji poa. Jamajjeya Amajama jjashahuabaquinaje jama ba'a: —E'e de, eya etii nei nei. Jamatii Eyacuiñajjiya eya e'e nei huohui cani. Jamaya ca'a cahua ohuaya. Eya quea osecua huiso nee nee poaje.

E'e jojo nei jamaya acanaje Eyacuiñajjiya, ma ecua ohuaya huohui canaje jamaya acanaje. Amajama quea osecua huiso nee nee po mee canaje, majameta huiosoaja sico meemee ajja, quea huiso nee nee.¹⁹ Eyacuiñajjiya esohui shajja'ajja majje Amajama jjashahuabaquia poa jama ba'a: —Eya etii nei nei, 100 shequijame etii. Ecuea ehuanase pealai etii nei, bacuama' pealai. Jamatii esho'yahua jjamejoqui jjima poanaje. Jamatii Eyacuiñajjiya ma ecua eya huohui canaje jamaya ohuaya ca'a cahua. Ecuea ebacua e'e jojo nei cuayaje, dejja —Amajama poanaje.²⁰ Jama po majamajanequinaje tii tii ba'a: —Eyacuiñajjiya eya e'e nei huohui canaje. Ohuaya eya jamaya amee caje. Oya ca ca oe siajje po ajja nei nei —jamaya mimi majamajanejo Amajama Eyacuiñajjiya epeejji quea ca'a nee nee poanaje. Bihuia ca poa jama ba'a: —E'e Eyacuiñajji, jamaya. Miyaya eya quea tame nee aña tii.²¹ E'e, miyaya quea ca'a nee nee poanijo, miquea ehuohui'yo jayojja jama aje'yo e'e jojo nei.

²² Amajama jamaya jjashahuabaquianijo, Eyacuiñajjiya oya huohui ca'ya poa: “Amajama, miya enijke jjapeequianijo, eyaya miya baña mimishi'ama. Miquea mimishi ecuijea'yo” Eyacuiñajjiya oya aca poa.

²³ E'e, Eyacuiñajjiya huohui ca poa Amajamaja ebajji jama ba'a: “Enijke jjapeequianijo eyaya miya baña mimishi'ama” Eyacuiñajji poanaje.²⁴ Eyacuiñajjiya jama tehueme aca poa esejaya ebajji ohuaya Amajama mimishi cuijea ca'ya poa onijke jjapeequianijo. Jamajjeya esejaya eba Amajama jayojjaya onijke jjapeequajo, Eyacuiñajjiya esejaya jama acaje pealai ba'a: “Eyaya miya baña mimishi'ama pealai” Eyacuiñajjiya esejaya acaje, de. Oya ca ca oe quea ca'a nee nee, ojjaña ohuaya acani; Jesosa esejaya Emeshi Mese nei emanoyojaa shequi mee ca o'yananje.²⁵ E'e, ojjaña quea mimishi poanijo, Eyacuiñajjiya Jesosa huoojea canaje emanoyojji esejaya mimishi sosequia'yojji. Majoya Eyacuiñajjiya oya shequi mee ca o'yananje. Shequi o'oya majje Jesosa jama poanaje ba'a: —Ecue Chii, ¡bacue! Ecuea epeejji cuanaja mimishi cuijea'yojji sosejje eya mano'yonaje. Oya cuana jjeya mimishi'ama enijke jjapeequianijo —oya Jesosaa acanaje.

Eyacuiñajjiya eseaya mimishi'ama ba cani

5 ¹ E'e, Jesosa nijje jjapeequianijo, Eyacuiñajjiya eseaya ba cani emimishi cuijea'yo. Jamajjeya Jesosa nijje, Emeshi Mese nei nijje jjapeequianijo, ohuaya Eyacuiñajji quea bei po mee cani ese nijje. Yahuajo ca ca quea mimishi poanijo, ese nijje quea quene nee poanaje.² Jesosa nijje jjapeequi majje eseaya Eyacuiñajji nijje mete'ama mimiani. Eseyaa jama poani ba'a: —Jesosa ecuanajo mano'yonajejo, ecuana Eyacuiñajjiyo mete'ama; oya ecuana nijje quea bei nee po mee canaje Jesosaa. Cuanaya ecuana quea bihui nee jjashahuabaquianyi quea ja'a nee jama ba'a: “Eyacuiñajjiya e'e jojo nei ecuana ba'e tiitii mee caje'yo onijke eyajo” —jamaya eseaya poani.

³Jesosa nijje jjapeequianijo, pea cuua eseya napa cani. Quea camaja poani. Jamatii eseya quea bihui nee poani, yeno'ama. Dejja mimishiya napa cajje eseya Jesosaja epeejji quea ca'a nee poaje'yo. ⁴Eseya quea bihui nee Jesosa nijje jjapeequi pajea'yo ajja jamatii onaa napa cajo, Eyacuiñajjiya eseya huohui cani jama ba'a: —E'e, jamaya miya quea pame nee poani.

—E'yacuiñajjiya eseya quea pame ba canijo, eseya jama poani pea'ai ba'a: —E'e jojo nei Eyacuiñajjiya eseya onijje ba'e tiitii mee caje'yo eyajo.

⁵E'e, esejaya eba Eyacuiñajjiya ojaya ehuohui jayojjaya acaje'yo. Ohuaya Edojjoshahua Pame huoojea canaje ese ba meeiji jama ba'a: —E'e jojo nei Eyacuiñajjiya oja sohui jayojjaya acaje'yo; miquianaya onijje ba'e tiitii mee caje'yo. Miquianaya ojaya quea jea nee nee —jamaya eseya Edojjoshahua Pameya jjashahuabaqui mee cani.

⁶E'e, Jesosa mano'yo jjimahuajo eseyaya Eyacuiñajji quene'ama epo meeiji pojjeama ese nijje, ¿achajja shai quene'ama epo mee'yojji? Yahuajo Eyacuiñajji jjashahuabaquinaje jama ba'a: —Eyaya ma eshequiajajo, ma pojjaeo Jesosa huoojeaje'yo shajjama' cuanajo mano'yohua. Ecuea eba epojja Jesosa manoje'yo —jamaya Eyacuiñajji poanaje.

Jamajjeya ma pojjaeo tii Jesosa mano'yonaje esejaya mimishi cuijea'yojji sosejje. ⁷¡Bacue! Beshahua nei eseya mano'yo sa po ajja pea mano'yo jjima epojji. E'e pojja'a oya quea pame nee nee ba'yanojo, ojo beca cuana mano'yome. ⁸Jamatii eseya Eyacuiñajjiya quea jea nee nee poanijo ohuaya jama acanaje ba'a: Ecuana quea mimishi poanijo tii oya, Jesosa mano'yonaje esejaya mimishi cuijea'yojji sosejje. ⁹E'e, Jesosa esejoya mano'yonaje eseya quea mimishi poanijo tii. Ojaya ena' cuayaquinaje esejaya mimishi cuijea'yojji. Jamajjeya eseya mimishi cuijea'yo majje Eyacuiñajjiya eseya ba cani mimishi'ama. E'e jojo nei. Jjeya ca ca oya ese nijje quene'ama; cuaqui yasijje ehuoojeajji pojjeama, de. ¹⁰E'e, yahuajo ese nijje Eyacuiñajji quea quene nee poa. Ese shajjama' poanijo tii Jesosa esejaya mimishi cuijea'yojji sosejje mano'yajo, Eyacuiñajji ese nijje quea quene popajeana. Jamajjeya Eyacuiñajji ese nijje quea bei poanijo, eseyaya baña jama ba'a: Jesosa shequi mee ca o'yanajejo, e'e jojo nei Eyacuiñajjiya eseya ba'e tiitii mee caje'yo onijje pea'ai. ¹¹E'e, Jesosaa, Emeshi Mese neiya esejaya mimishi cuijea'yojji, Eyacuiñajji quea bei nee ese nijje, epeejji nei po mee cani. Jamajjeya eseya quea bihui nee jama poani ba'a: —Eyacuiñajji, miya quea pame nee; ecuana quea jea nee poani.

Yahuajo eseya Adana jayojja ba'ya poa; jjeya ca ca eseya Jesosa jayojja ba'yani

¹²¡Bacue! Yahuajo nei nei Adana ba'ya poa. Oya ojjañaja ejejaji poa. Oya Adana ebionei shajjama' poa. Jamajjeya esejaya ejejaji Adana shajjama' poajo, Eyacuiñajjiya ojjaña ba cani shajjama' nei nei, Adana jayojjaya: "Miya shajjama' poanijo, manoje'yo ojjaña" Eyacuiñajjiya Adana huohui ca poa. Jamajjeya Adana mano'yonaje. O jayojjaya ojjaña mano'yani. Ojjaña shajjama' poani cuana, de. ¹³E'e, Adana ebionei shajjama' poa. Moisesiya Eyacuiñajjiya

esohui tehue jjimahuajo, jamaya ojjaña po poquia poa, quea mimishi. Yahuajo Moisesija esohui tehue jjimahuajo, Eyacuiñajji etiiquiana nijje jama mimi jjima ba'a: —Ecue sohui jama ba'e ajjajo miquianaya shajjama' —jamaya Eyacuiñajji etiiquiana nijje mimi jjima yahuajo, maya tehue jjima poa Eyacuiñajjiya esohui.

¹⁴E'e, Adana shajjama' po majje, Moisesija esohui tehue jjimahuajo aje oe ojjaña mano poquipoqui'ya poa quea tai ba'yanijo. Onajaya Eyacuiñajjiya esohui shajja'ajja jjimajo Adana jayojja jama pojjeama. Adana ca ca Eyacuiñajjiya esohui shajja'ajja majje shajjamaa jjejojo acuijjajja ijja ca poa, de. Eyacuiñajjiya Adana ebionei pana ca poa. Quije ohuaya oja Bacua Jesosa huoojea canaje.

¹⁵¿Ae poanaje Adana? ¿A'a Adanaa jayojja jama acanaje Jesosaa? Chojja, quea pame nee nee eseya acanaje, Jesosaa. Shajjamaa jjejojo Adanaa ca pa jjaja ca oe ojjaña cuana shajjama' po mee ca poa. Jamajjeya ojjaña mano jeyojeyo mee ca'ya poa. Mano'yo majje cuaqui yasijje poqui ca'ya poa. Jjeya Jesosa Quitojo eseya ba'e tiitii mee caje'yo Eyacuiñajjiya. E'e, eseya Eyacuiñajjiya quea jea nee poanijo Jesosa Quito huoojea canaje ese que. Oya Jesosa ese jayojjaya yamijji poeyanaje eseja mimishijo mano'yohua mimishi cuijea'yoji.

¹⁶E'e, Eyacuiñajjiya eseya quea jea acanijo Jesosa huoojea canaje mano'yohua eseja mimishi cuijea'yoji sosejje. Jamajjeya eseya quea mimishi po huicha'a huicha'a majje, jamatii Eyacuiñajjiya eseya huohui cani jama ba'a: —Eyaya miya baña emimishi cuijea'yo.

Adana ca ca shajjama' po cooa poajo, Eyacuiñajjiya oya huohui ca'ya poa jama ba'a: "Adana, miya ca mi ca oe shajjama!. Jamajjeya miya manoje'yo; quea nee nee poaje'yo. Mique osecua cuana pea'ai mi jayojjaya mano'yomeya poaje; jama mano'yomeya popoquije'yo mique osecua cuana" poanaje. ¹⁷E'e, oe dejja quea mimishi po cooa poajo, Eyacuiñajjiya ojjaña mano mee ca'yani; quea nee nee po mee ca poqui'yani. Jesosa Quitohua ca ca eseya quea pame nee acanaje. Eyacuiñajjiya ojjaña quea jea nee nee poanijo oja Bacua Jesosa huoojea canaje ese jayojjaya yamijji. Jesosa ojjaña cuanajo mano'yonaje mimishi cuijea'yoji sosejje. Ohuaya eseya ba'e tiitii mee caje'yo onijke. Jesosa nijje ona huoojea'yoji po mee caje'yo, Eyacuiñajjiya.

¹⁸E'e, Adana shajjama' poa. Oya shajjama' poajo, Eyacuiñajjiya ojjaña ba cani shajjama!. Ojjaña quea nee nee po mee caje'yo. Jesosa Quitohua ca ca quea pame acanaje esejo; ese mimishi cuijea'yoji mano'yonaje. Jamajjeya Jesosa nijje jjapee neineiquianijo, Eyacuiñajjiya esejaya mimishi cuijea majje mimishi'ama ba cani. Mimishi cuijea'yo majje eseya ba'e tiitii mee cani onijke eyajo. ¹⁹Jama ba'a: Oe dejja, Adana shajjama' poa. Jamajjeya ojjaña o jayojja jama shajjama' poani. Pea dejja, Jesosaa ca ca oja Chijja, Eyacuiñajjiya esohui jayojja jama aca poa. Jamajjeya eseyaya, ojaya epeejji cuaa Jesosaa jayojjaya aña; Eyacuiñajjiya esohui shajja'ajjaña. Jamajjeya Eyacuiñajjiya eseya ba cani mimishi'ama.

²⁰Adana shajjama' poajojo quijke nei nei Eyacuiñajjiya Moisesi tehue mee ca poa ojaya esohui. Ojaya esohui tehue mee ca'ya poa ojjaña ebajji oya cuana Eyacuiñajjiya esohui jayojja jama a'ajja tii. Jamatii esohui ba

majje ojjaña quea mimishi tii tii poani. Eyacuiñajji ca ca quea pame po tiitiiani ojjaña nijje. Quea mimishi tii poanijo aje oe jamatii ohuaya eseya quea jea nee acani tii. ²¹ Yahuajo esohui etehue'yo ba majje jamatii etiiquiana cuana mimishi pajea sa po'yo ajja poa. Jamajjeya oya cuana mano'yo majje cuaqui yasijje poqui'yonaje. Eyacuiñajjiya ca ca eseya shajjama' poani tii quea jea nee acanaje. Esejaya Emeshi Mese nei Jesosa Quito huoojea canaje ese mimishi cuijea'yohua ese ba'e tiitii mee'yojji.

¡Mimishi pajea'yocue; Jesosa nijje jjapeequicue!

6 ¹Eyacuiñajjiya eseya quea jea nee acani; jamatii quea mimishi poanijo beca cuana jamaya poani pojja'a ba'a: —¡Dee! Jamajjeya eya quea mimishi capoahua tii. Jamaya Eyacuiñajjiya eseya caba mee cahua eseya ohua quea jea nee acani jamatii —jamaya pojja'a beca cuana poani.

² ¡Choja! ¡A'a oe jamaya pojji! Jiquio ecua ese ejja mano'yo majje shajoshajo'yo ajja jama jayojjaya eseya Jesosa nijje jjapeequi majje mimishi sa po maja'yo ajja. Cajaa seya aña. ³E'e, eseya Jesosajo besa majje, ohuaya eseya ba cani ojaya epeejji mimishi po maja sa po'yo ajja. ¿A'a miquea maya ba jjima?

—E'e, eya Jesosa nijje jjapeequiani —eseyaya jamaya huohui majje, onaaya eseya Eyacuiñajjiyo besa mee cani. Jamajjeya jiquio ecua emano'yo cuana shajoshajo'yo ajja jayojja jama eseya mimishi po maja sa po'yo ajja Jesosa nijje jjapeequianijo. ¿A'a miquea maya ba jjima? ⁴Jesosa mano'yonaje. Mano'yo majje mei jjani ai yasijje huananobia ca'yonaje. Eyacuiñajji quea ca'a nee nee. Jesosa shequi mee ca'yonaje jama jayojjaya ohuaya eseya pea jjashahuabaquime po mee ca'yani Jesosa nijje jjapeequianijo. Jesosa nijje jjapeequiajo pea'ai onaaya eseya enajo besa mee cani Eyacuiñajjiyo. Jamajjeya Jesosaa eseya ba cani o jayojja e'e jojo nei, yahuajo jama pojjeama. Pea jjashahuabaquime poani, de; mimishi po maja sa po'yo ajja.

⁵Jamajjeya eseya jama poani ba'a: —Jesosa Quito acui ecueatal'apeejo mano'yonaje esejaya mimishi cuijea'yoji. Jamajjeya eseya onijje jjapeequi majje mimishi pajea neinei sa poani. Eyacuiñajjiya Jesosa shequi mee ca o'yananje; ba'e mee ca o'yananje. O jayojja jjashahuabaqui meeme po mee ca'yani.

⁶Jamaya esejaya eba ba'a: Jesosa Quito acui ecueatal'apeejo mano'yonaje eseya ojaya epeejji quea ca'a nee epo meejjii, mimishi pajea neinei meesahua'yoji. Esejaya eba'e yahuajo, ejjashahuabaquijji yahuajo jayojja jama pajea mee ca'yonaje, eyacua po mee canaje. Yahuajo jama poanaje ba'a: Jiquio ecua sosema' chacochacoani echacomiejjiya yajjijo chacochaco pajea mee jjima acani jayojja jama yahuajo eseya mimishi pajea'yo jjima poanaje. ⁷Jama ba'a: Ese ejjaa mano'yo majje mimishi amaja ajja. Oya jayojjaya eshahuaja epeejji emano'yo jayojja jama Jesosaa eseya po mee cani ojaya epeejji nei epojji.

⁸Jamajjeya onijje jjapeequi majje Jesosa Quito mano'yonaje jayojja jama ecuana eshahuaja epeejji poanijo emano'yo jayojja poanaje; Jesosa shequi'yonaje jayojjaya eseya o jayojja ba'yani, yahuajo jama pojjeama. E'e

jojo nei eseya onijke ba'e tiitije'yo eyajo; o jayojjaya pea'ai poaje'yo. ⁹E'e, Jesosa emano'yo jaa Eyacuiñajjiya oya shequi mee ca o'oyanaje. Eshe nequi'yo, emano beca'yiji pojjeama. Pea cuaa oya mano mee'yo jjima acaje'yo. ¹⁰Oya mano'yonaje; oe nei mano'yome poanaje esejaya mimishi cuijea'yoji. Oya Jesosa mano beca'yо ajja. Jjeya oya eshe'yo; Eyacuiñajjiya ejjashahuabaquijji jayojja jama atiitii cani. ¹¹Jamajjeya ojaaña Jesosaja epeejji cuana, ijashahuabaquicue jama ba'a: —Eya mimishi pajea neinei'yo sa poani —pocue!

E'e, jiquio ecua emano'yo cuana shajoshajo'yo ajja jayojja jama Jesosaja epeejji cuana mimishi po maja sa po'yo ajja. Pea jjashahuabaquime po'yani, de. Jjeya Jesosa nijje jjapee neineiquianijo eseyaya o jayojja. Eyacuiñajjiya ejjashahuabaquijji jayojja jama atiitiaña.

¹²Jamajjeya eshahuaa miquianaya shajjama' po mee sa acanijo, ja'a shajjama' pojji! Chojja. ¡Ejjashahuabaquijji yahuajo quea tai, quea mimishi jayojja jama a'a pojji! ¹³Eshahuaa miquianaya quea mimishi o jayojja jama po mee sa acani. ¡A'a jjashajja'ajjaquijji! Eyacuiñajjiya ca ca miya quea pame, o jayojja jama po mee sa acani. ¡Oya shajja'ajjacue! Ohuaya miya pea jjashahuabaquime po mee ca'yani. Jamajjeya ja'b'ecue ojaya ejjashahuabaquijji quea pame nee jayojja jama! ¹⁴E'e, Eyacuiñajjiya huohui canaje jama ba'a: —¡Mimishi pajea neinei'yocue!

Jamatii ojaya esohui etehue'yo shajja'ajja majje mimishi pajea meemee'yo ajja. Eyacuiñajjiya ca ca oe eseya quea jea nee acani; mimishi pajea meesahua ca'yani. Jamajjeya ¡eshahuaa miya shajjama' po mee sa acanijo a'a jjashajja'ajjaquijji! Jjeya oya, eshahua ese huoojea'yoji pojjeama, de. Eyacuiñajji ca ca esejaya Emeshi Mese nei, ese huoojea'yoji poani.

Eyacuiñajjiya echacojji quea pame

¹⁵Jamajjeya jjeya Eyacuiñajjiya eseya napa ajja esohui etehue'yo jayojja jama ajjimajo. Chojja, Eyacuiñajjiya eseya quea jea nee acanijo esejaya mimishi cuijea ca'yani. Huohui jjima jama ba'a: —Esohui etehue'yo jayojja jama ba'yanijo, eyaya miquianajaya mimishi cuijeaje'yo —jamaya jjeya huohui jjima Eyacuiñajjiya.

Jamajjeya ¿ae jjashahuabaquiani eseya? ¿A'a quea mimishi capoahua? ¹⁶Chojja de. ¡Bacue! Jiquio ecua echacomeejji nijje poquiajo, ohua mee'ajja cajje miya chacocho majje miya ojaya echacojji poani, oya mi huoojeajji poani jama jayojjaya eshahua jayojja jama añajo miya ojaya epeejji poani, oya mi huoojeajji poani. Miya jamaya po majje quea nee poaje'yo quijje cuaquijo. ¡Eyacuiñajji mi huoojeajji poanijo ojaya esohui shajja'ajjacue! Ohuaya miya quea boejea ba'e mee caje. Majoya miya ba'e tiitii mee caje'yo eyajo, Eyacuiñajjiya. ¹⁷Jamajjeya eyaya Eyacuiñajji bihuaña ohuaya miquianaya eshahua jayojja nahue canijo. E'e, yahuajo eshahua mi huoojeajji poanijo shajjama' poanaje. Jjeya ca ca ecuea esohui shajja'ajja majje Eyacuiñajjiya esohui e'e nei jayojja jama aña quea bihue nee. ¹⁸Jamajjeya Eyacuiñajjiya miquea eshahua poqui mee ca'yonaje, mi huoojeajji pojjeama po mee ca'yonaje. Jjeya Eyacuiñajji mi huoojeajji poani. O jayojja ba'e mee ca'yani. Jamajjeya miyaya ojaya esohui

jayojjaya jama aña quea bihui nee. ¹⁹Miquea eba neineiji eyaya quea ja'a esohui huohuaña jama ba'a: Yahuajo eshahua mi huoojeajji poanaje, miyaya o jayojja ojjaña mimishi a sa anaje, quea ja'a jjashahuubaqui sa po aija poanaje. ¡Jjeya ca ca Eyacuiñajji mi huoojeajji nei nei a'yocue! ¡Ojaya ejjashahuubaqui'yojji jayojja jama atiitiicue quea pame nee eba'e'yojji!

²⁰Yahuajo aje oe eshahua mi huoojeajji poanijo, miquianaya quea pame po sa po'yo aija nei nei poanaje. ²¹Eshahua jayojja jama quea mimishi ba'enajejo ;a'a quea bei po tiitii mee canaje? Cho. Jjeya ma ecua ese ba'enaje jamajo eseya quea bicho nee nee poani. Jamaya eba'e tiitii jojjemo Eyacuiñajjiya eseya cuaquí yasijje huoojea ca'yoquiyate. ²²E'e, yahuajo eshahua mi huoojeajji poanaje. Eyacuiñajjiya miquea eshahua poqui mee ca'yonaje. Jjeya ca ca Eyacuiñajji mi huoojeajji poani. Oya shajja'ajjañajo, ohuaya miya quea boejea'yo po mee cani; ba'e tiitii mee caje'yo eyajo. ²³Eyacuiñajjiya shajjama' cuana huoojea caje'yo cuaquí yasijje eshahua nijje quea mimishi poanaje sosejje. Pea ca ca jama ba'a: Eseya jamatii quea pame ba'e meemee aija. Emeshi Mese nei Jesosa Quito nijje jjapeequianijo, Eyacuiñajjiya eseya o jayojja jjashahuuba meequei ca'yani; eseya ba'e tiitii mee caje'yo eyajo onijje. E'e de, eseya jamatii quea pame nee ba'e neinei aija.

Esohui eba meesahuajji epona ahuejjijo

7 ¹Ecuea epeeji cuana, Eyacuiñajjiya esohui etehue'yo miquianajaya eba. Jamajjeya jama baña ba'a: Eseya eshe nequijo ca ca oe esohui etehue'yo jayojja jama caba'yahua tii, mano'yo majje pojjeama. ²Miquiana ba meesahuajji eyaya jama huohuaña ba'a: Eyacuiñajjiya jama huohui canaje ba'a: —Ehuanase ojaya yahue nijje caba'yahua tii tii. ¡Yahue mano'yo jjimajo, pea nijje a'a jjahueaqui mee'yojji! ¡O mano'yojo ca ca peajo cajjahueaqui'yahua! ³Ojaya yahue mano'yo jjima eshe nequi tiijo, peajo jjahueaqui nisho'yanijo, oya ehuanase pea cojjoji poani. Ojaya yahue mano'yo majje ca ca oya e'ahuemano. Oya ahuema' jayojja peajo cajjahueaqui'yahua. Jjahueaqui o'oya majje pea cojjoji jayojja jama pojjeama —jamaya huohui canaje yahua nei Eyacuiñajjiya.

⁴Jamajje ecuea epeeji cuana, miquianajaya eba neineiji eyaya jamaya huohuaña. Jesosa nijje jjapeequianijo epona e'ahuemano jjahueaquinai jayojja jama poani. E'e, yahuajo Jesosa ba jjimahuajo eseya quea quehua jjashahuubaquinaje jama ba'a: —Eyacuiñajjiya esohui etehue'yo jayojjaya jama atiitiiañajo, ohuaya eseya ba'e tiitii mee caje'yo onijje eyajo —jamaya eseya po'ajjanaje.

Jjeya ca ca Jesosa esejaya mimishi cuijea'yojji sosejje mano'yonajejo yahua jama jjashahuubaqui aija, de. Jjeya ca ca pea jjashahuubaquime poani. Jiquio ecua oja yahue mano'yo majje ehuanase peajo jjahueaqui'yani jayojja jama jjeya eseya Jesosa nijje jjapeequi'yani. Eyacuiñajjiya Jesosa emano'yojaa shequi mee ca o'oyanaje jayojja jama eseya pea jjashahuubaquime po mee ca'yani. Jamajjeya eseya jjashahuubaquinai quea pame nee eba'ejji, Eyacuiñajji quea bihui nee epo

meejji. ⁵Yahuajo Jesosaja epeejji po jjimahuajo eseya ba'enaje esejaya ejjashahuabaquijji quea tai jayojjaya. Eyacuiñajji esohui etehue'yo ba majje shajjama' po sa neinei poanaje jama ba'a: "¡A'a pea siijjil!" ba majjeya eseya pea sii sa neinei poanaje. Jamaya eseyaya Eyacuiñajji quea quene po meenaje. Jamajjeya Eyacuiñajji nijje eba'e'yojji tii tii pojjeama. ⁶Yahuajo aje oe eseya mimishi pajea meemee ajja. Jiquio ecua Eyacuiñajji esohui shajja'ajja majje jamatii ameemee ajja. Jjeya ca ca Jesosa esejaya mimishi sosejje mano'yonajejo, eseya pea jjashahuabaquime poani. Eseyaya baña esohui etehue jayojja jama añajo pojjeama Eyacuiñajjiya eseya quea pame ba'e tiitii mee caje'yo. Jesosa nijje jjapeequianijo ca ca eseya pea jjashahuabaquime poani. Edojoshahua Pameya eseya quea pame nee ba'e meesahua canijo, Eyacuiñajji quea bihui nee po mee sa aña.

**Eyacuiñajji esohui ba neinei majje esejaya
eba poa eseya shajjama' nei poani**

⁷Eyacuiñajji esohui etehue'yo ba majje ca ca esejaya eba poa eseya shajjama' poani. Jamatii beca cuana jama poani pojja'a ba'a: —¿A'a esohui etehue'yo jayojja jama e'a'yojji pojjeama?

Chojja, quea pame nee. Etehue'yo ba jjima jojjemo esejaya Eyacuiñajji quea quene poani ba jjima pome. E'e, Eyacuiñajji esohui etehue'yo jama poani ba'a: "¡A'a oe onajaya aquiana jea bajji!" poani. Jamatii Eyacuiñajji esohui ba jjima jojjemo onajaya aquiana jea bañajo Eyacuiñajji enijke quea quene poani ecuea ba jjima pome. ⁸Ma ba majje ca ca eshahuaa eya onajaya aquiana jea ba neinei mee canaje quea huiso nee. Yahuajo esohui ba jjimajo ca ca ecuea ba jjima poanaje eya shajjama' poani onajaya aquiana jea ba majje. ⁹Yahuajo esohui etehue'yo ba jjimajo eya shajjama' pojjeama poso jjabaquinaje. Quijje Eyacuiñajji esohui etehue'yo ba majje ca ca eyaya banaje jama ba'a: —E'e, eya ca iña shajjama' nei nei poani, de. Eyacuiñajjiya eya quea nee nee po mee caje'yo, de —eya poanaje.

¹⁰Jamajjeya Eyacuiñajji esohui jama eba'e tiitii jojjemo eseya Eyacuiñajji nijje ba'e tiitii mee'yome. Eyaya ojaya esohui jama ajjima tiitijo ca ca eya Eyacuiñajjiya quea nee nee po mee caje'yo. ¹¹Eyaya Eyacuiñajji esohui etehue'yo jayojja jama a'lajja'yonaje. Chojja, ameemee ajja, de, quea mimishi nee nee. Jamajjeya esohui jayojja jama atiitii jjimajo aje oe Eyacuiñajji enijke quea quene nee nee poaje, eya quea nee nee po mee caje'yo tii tii. ¹²Jamatii Eyacuiñajji esohui etehue'yo quea pame nee e'e jojo nei, Eyacuiñajji ejjashahuabaquijji ese quea bihui ba'e meesahua. ¹³Jamajjeya Eyacuiñajji esohui quea pame ba neinei'yo majje, ¿a'a Eyacuiñajjiya eya quea nee nee po mee caje'yo? Chojja, jamaya pojjeama. Eyacuiñajjiya ojaya esohui tehue mee ca poa ojjañaja ebajji shajjama' nei nei quea tai nee nee poanai cuana jjabahuejjaquijji Eyacuiñajjiya quea nee nee po mee caje'yo. Jamajjeya esohui ba jjimajo eya shajjama' pojjeama poso jjabaquinaje; ba majje ca ca jamatii eya

mimishi po majamaja sa neinei poanaje. Eyacuiñajji quea quene po meenaje enijje. Quea pame po sa poani, jamatii quea pame po ajja. Mimishi boti'ama; jamatii jamaya eyaya aña. ¹⁴Esejaya eba Eyacuiñajji esohui quea pame nee nee. Eya ca ca pame'ama, shajjama' pea'ai, de. Jamajjeya eya jamatii quea pame ba'e meemee ajja ojaya esohui jayojja. Jiquio ecua echacojji ojaya echacomiejiji esohui jayojja chaco sa po ajja, jamatii jamaya chaco caje jama jayojjaya eya quea mimishi po sa po'yo ajja, jamatii quea mimishi poani. ¹⁵Eyacuiñajji esohui jayojja jama a'ajja majje eya jjashahuabaquiani jama ba'a: —¡Dee! ¿Apiojji shai eya quea pame nee po ajja? E'e de, eya quea pame po nishoani.

Eya quea mimishi po majje jjashahuabaquiani jama ba'a: —¡Dee! ¿Apiojji shai eya quea mimishi poanaje? Jamaya eya po sa po'yo ajja —jamaya eya jjashahuabaquiani.

¹⁶E'e de, ecuea eba Eyacuiñajji esohui quea ja'a nee. Jamajjeya eya quea yeno poani ma esohui jayojja jama mi amajje. ¹⁷Jjeya ca ca ecuea pea jjashahuabaquime quea ja'a poanijo ma ecua eya yahuajo ba'yaninaje jama po sa po'yo ajja. Jamatii ecuea ejjashahuabaqui'yojji quea mimishi; e poaninaje yahuajo pajepajea'yo ajja. E'e de, ecuea ejjashahuabaquijji quea mimishi yani, de. Cajaa.

¹⁸Ecuea eba jama ba'a: Quea mimishi jjejojo eya jamatii quea ja'a nee jjashahuabaqui ajja tii tii. Eya quea ja'a nee po sa po'yo majje jamaya eyaya ameemee ajja, de. Quea mimishi nee nee iña, de. ¹⁹E'e de, eya quea pame nee po sa poani. Jamatii quea pame, quea ja'a po'ajjani. Mimishi po sa po'yo ajja, de. Jamatii quea mimishi poani. ²⁰Mimishi amajje eya quea yeno poani. Mimishi a sa po'yo ajja. Jamajjeya mimishi a'yo majje ecuea eba ecuea eba'ejji ma ecua eya yahuajo ba'yaninaje jama eyaya atiitiñaña.

²¹E'e, eya quea pame nee Jesosa jayojja ba'e sa poani nei nei. Jamatii eya ca'a'majo quea pame atiiti aja. Ecuea ejjashahuabaquijji quea mimishi yani, ma e yahuajo ba'yaninaje quea tai poaninaje. Maya eya pajepajea'yo ajja. ²²E'e de, Eyacuiñajji esohui ecuea quea jea nee nee. Maya eyaya a sa aña. ²³Jamatii ecuea ejjashahuabaquijji jjeya jiquio jama ba'a: —Quea pame nee a sa aña Eyacuiñajji esohui jayojjaya —eya poani. Jamatii jamaya eyaya ameemee ajja. Ecuea ejjashahuabaquijji yahuajo jayojja jama aña, quea mimishi. E'e de, eya quea mimishi nee nee; mimishi cuana pajea'yo ajja. Eya jama poani ba'a: Onajaya esohui quea mimishi jayojja jama eyaya aña tii tii. ²⁴E'e, eya quea yeno poani mimishi amajje. ¿Aya acuae eya mimishi pajea neinei meesahua caje'yo so'o? ²⁵Esejaya Emeshi Mese nei Jesosa Quito quea ca'a nee nee poani. Jamajjeya ohuaya eya mimishi pajea meesahua caje'yo, e'e jojo nei. Jamajjeya eyaya Eyacuiñajji bihuiaña jama ba'a: —Ecue Chii, miyaya eya jaahuanaña quea pame nee nee.

E'e, Eyacuiñajji esohui jayojja jama a sa aña. Jamatii eyaya jamaya pojjeama atiitiñaña. Jesosa Quito ca ca quea ca'a nee nee poani. Ohuaya eya mimishi pajea meesahua ca'yani. Jamajjeya Eyacuiñajji esohui jayojja jama eyaya aña.

**Edojjoshahua Pameya eseya ba'e mee cani
Jesosa jayojja, yahuajo jama pojjeama**

8 ¹Jjeya Jesosa Quito nijje jjapeequianijo, Eyacuiñajjiya eseya huohui cani jama ba'a: —Eyaya jja miquianaya emimishi cuijea'yo baña. Jesosa Quito mique mimishi cuijea'yoji poanaje. Quea boejea poanijo, miquianaya ecuea etecueajji pojjeama —Eyacuiñajji poani.

²Yahuajo Jesosa Quitoja epeeiji pojjeama poanaje. Yahuajo eseya quea mimishi po tiitiianijo cuaqui yasijke edobiquijji nisho poanaje. Jjeya ca ca Jesosa Quitoja epeeiji poanijo, Edojjoshahua Pameya eseya ba'e mee cani o jayojja, mimishi'ama. ³E'e, eseya quea mimishi poaniya jjejojo Eyacuiñajjiya esohui jayojja jama ameemee aja. Jamajjeya Eyacuiñajjiya eseya quea boejea pojjeama ba cani. Chojja. Eseya quea mimishi nee nee poanaje. Jamajjeya Eyacuiñajjiya Jesosa, oja Bacua Ejja oe nei huoojea canaje jiquio meshi yasijke. Oya, Jesosa yamijji dejja jayojja poanaje. E'e, Jesosa ese jayojjaya yamijji poa, jamatii oya mimishi'ama tii. E'e, Jesosa mano'yonaje esejaya mimishi cuijea'yoji, esejaya mimishi sosequia'yoji pealai. Jesosaa esejaya mimishi pajea meesahua ca'yanijo, Eyacuiñajji ese nijje quea bei poani. ⁴Jamaya acanaje Eyacuiñajjiya eseya ojaya esohui etehue'yo quea ja'a nee jayojja jama ameeya, ojaya ejjashahuabaquijji quea ja'a nee jayojja jama epo meeiji pealai. Jjeya Edojjoshahua Pameya eseya ba'e mee cani Eyacuiñajjiya esohui jayojjaya. Jjeya eseya Jesosa jayojja ba'yani, pea jjashahuabaquime poani, yahuajo jayojja jama pojjeama. Yahuajo quea mimishi poanaje, jjeya ca chojja. ⁵Beca cuana quea mimishi ba'e sa poani, yahuajo ba'enaje jama. Ojaya ejjashahuabaquijji quea mimishi jama atiitii cani. Mimishi pajea sa po'yo aija tii. Pea cuaa ca ca Edojjoshahua Pame shajja'aja cani. Ojaya ejjashahuabaquijji quea pame jayojja jama jjashahuabaquime poani pealai. E'e, Edojjoshahua Pameya Jesosaja epeeiji cuana jjashahuabaqui meesahua cani o jayojjaya. ⁶Ojjaña quea mimishi ba'yaniya ejjashahuabaquijji quea mimishi jama atiitii cani. Mimishi cuana pajea sa po'yo aija nei nei. Jamajjeya cuaqui yasijke poquije'yo. Quea nee nee poaje'yo. Edojjoshahua Pameya eseya Eyacuiñajjiya ejjashahuabaquijji jayojja jama po meesahua cani. Jamajjeya eseya ba'e tiitii mee caje'yo eyajo Jesosa nijje quea bei nee nee. ⁷Ojjaña quea mimishi, quea mimijjequiea jjashahuabaquiani Eyacuiñajjiya epeeiji pojjeama. Shajjam'a cuana, de. Oya cuana Eyacuiñajjiya esohui jayojja jama a'laja tii. Mimishi pajea'yo aija tii tii. ⁸E'e, quea mimishi, quea mimijjequiea poanijo, Eyacuiñajji onijje quea bei pojjeama poani.

⁹Jesosa Quitoja epeeiji Shoma cuiñajjiro ba'e, miquianaya yahuajo quea mimishi poa. Jjeya ca chojja. Edojjoshahua Pameya miquianaya ba'e meesahua cani quea pame nee nee, yahuajo jama pojjeama. E'e, Edojjoshahua Pame Jesosaja epeeiji cuana huasijke edobiquinequi. O miquiana que dobiqui jjima jojjemo miquianaya Jesosaja epeeiji pojjeama pome, miquianajaya mimishi cuijea'yo jjima pome. ¹⁰E'e jojo nei Jesosa Quito miquiana nijje nequi tiitiiani. Ohuaya miquianajaya edojjoshahua ba'e tiitii mee caje'yo miquea mimishi

ecuijea'yojojo. E'e, miquianaya mano'yo majje eyami ihuije'yo quea mimishi poa jjejojo. ¹¹ Jamatii Eyacuiñajji quea ca'a nee nee poani; ohuaya Jesosa emano'yoja shequi mee ca o'yananje. Jamajjeya Jesosaja epeejji poanijo, ohuaya miquianaya ba'e mee caje o'oya eyami eyacua nei. Emano beca'yoji pojjeama. Jamaya poaje Edojoshahua Pame miquiana huasijje dobiqui majje.

¹² Jamajjeya ecuea epeejji cuana, jmiquianaya Jesosaja epeejji poanijo, pea jjashahuubaquime poanijo Eyacuiñajji esohui jayojja jama acue! ¡Yahuajo jayojja jama a'a po o'oyajji! ¹³ E'e, quea mimishi po tiitiianijo, Eyacuiñajjiya eseya quea nee nee po mee caje'yo. Edojoshahua Pameya ca ca ojjaña eseya mimishi pajea meesahua caje'yo. Jamajjeya mimishi pajea'yo epo Eyacuiñajjiya eseya ba'e tiitii mee caje'yo onijke eyajo. ¹⁴ Ojjaña joya Edojoshahua Pame jayojja jama jjashahuubaquime poani Eyacuiñajji bacua cuana poani.

¹⁵ Yahuajo, Jesosaja epeejji po jjimahuajo eseya quea mete ba'enaje. Eshahua jayojja jama jjashahuubaquime eseya poanaje. Jjeya ca ca Edojoshahua Pameya eseya Eyacuiñajji bacua po mee cani. Ohuaya eseya mimi meesahua cani Eyacuiñajji nijje jama ba'a: —Eyacuiñajji, miya ecue Chii e'e jojo nei.

¹⁶ E'e, jjeya Eyacuiñajjiya ba cani eseya oja bacua poani. Edojoshahua Pameya eseya ba mee cani jama ba'a: —Miquianaya Eyacuiñajjiya bacua cuana poani.

¹⁷ Jamajjeya Eyacuiñajjiya bacua cuana poanijo ojjaña ojaya aquiana esejaya poaje; eseya ohuaya quia caje'yo. E'e, ojaya esohui yahuajo jayojja jama acaje'yo ese nijje jama ba'a: Ojjaña aquiana Eyacuiñajjiya quia ca'yonaje Jesosa Quito que. Maya aquiana esejaya poaje'yo pe'a'i Jesosa Quito nijje jjapeequianijo. Onijke jjapeequianijo, pea cuaa eseya napa caje, quea nee nee po mee caje'yo. Jamatii. Ecuana quea nee poani Jesosa jayojja. Jamajjeya Eyacuiñajjiya eseya ba'e tiitii mee caje'yo Jesosa nijje quea ja'a nee eyajo. Onijke ona huoojeajji po mee caje'yo.

Quijje eseya quea pame nee anije'yo eyajo Jesosa nijje

¹⁸ Jjeya eseya jiquiojo tii quea yeno poani, quea nee poani Jesosa nijje jjapeequianijo. Jamatii ja'a quea yeno pojji! Quea pame nee nee eseya ba'e tiitiije'yo Jesosa nijje eyajo.

¹⁹ Adana, esejaya ejearaji quea mimishi poa. Adana quea mimishi poanijo, Eyacuiñajjiya ojjaña ojaya epana'yo cajaa acanaje beshahua nei. Eseya Eyacuiñajjiya bacua cuana quea ja'a nee, quea ca'a nee Jesosa nijje poanijo, ojjaña aquiana cajaa ya'yojji pojjeama po mee caje'yo Eyacuiñajjiya. ²⁰ E'e, yahuajo nei Eyacuiñajjiya ojjaña quea pame nee pana ca'y poa. Adana quea mimishi poajo ca ca Eyacuiñajjiya ojjaña cajaa aca poa. Quijje ojjaña aquiana cajaa ya'yojji pojjeama poaje'yo. Ma Eyacuiñajjiya ebionei pana ca poa jayojja ishoa ca ani, ojjañaa. ²¹ E'e, jjeya ojjaña aquiana mano'yani, ihui'yani pe'a'i. Quijje, Jesosa poe o'yojjo ca ca ojjaña aquiana cuana quea pame nee poaje o'oya. Adana quea mimishi po jjimahuajo jama jayojjaya poaje o'oya. Eyacuiñajjiya bacua

cuana, ma Jesosa nijje jjapeequiani quea pame nee poaje'yo Jesosa poe o'oyajo. Ma shejo ojjaña aquiana ojjaña Eyacuiñajji panay' quea pame nee poaje o'oya. ²² Adana quea mimishi poa jojoya ojjaña aquiana quea nee, quea tai, quea camaja nee poa. Jjeya nei pea'ai jamaya poani, jiquio jama ba'a: Jesosa poe o'oya jjimahuajo ojjaña Eyacuiñajji panay' quea yeno, quea nee poani, jiquio ecua epona bacua cuayani jama jayojja quea nee poani bacua cuaya jjimahuajo. ²³ Edojoshahua Pame dobiqu'yonaje ese que, Jesosaja epeejji cuana huasijje. Jamatii eseya pea'ai quea nee, quea mano, quea shoe pea'ai poani. Edojoshahua Pameya eseya ba meesahua cani jama ba'a: Jesosaa poe o'oya majje eseya quea pame nee po mee caje'yo eyacula. Eyacula po'yo majje mano'yo aija, nee'ama ba'e tiitije'yo eyajo pea'ai. Eyacuiñajji esohui ma ecua ohua yahuajo huohui canaje jayojja jama ohuaya eseya, ojaya bacua cuana acaje'yo Jesosa poe o'oyajo. Jamajjeya eseyaya ishoaña Jesosaja epoe o'oyajji. Eba'eiji eyacula quea pame nee esejaya poaje, de. ²⁴ Jama poaje ba'a: Eyacuiñajji eseya mimishi cuijea'yo majje ba'e tiitii mee cani. Esejaya eyami eyacula amee caje'yo pea'ai, Jesosa poe o'oyajo. Jamajjeya eseyaya ishoaña ojaya epoe o'oyajji. Jjashahuabaquiani quijje eyacula epoji. ²⁵ Jamajjeya ishoaña tii tii Jesosa ache shono poeje o'oya ebajji. Eyami eyacula yajji eseyaya ishoaña quea bihui nee nee.

²⁶ Cuanaya eseya ca ca cal'ama poanijo, Edojoshahua Pameya quea ja'a nee ba'e meesahua cani. Eba'eiji quea camajajo Eyacuiñajji nijje emimiji esejaya ba jjima. ¿Yajja mimime epoji? Jamajjeya Edojoshahua Pame esejo mimi neineiani Eyacuiñajji nijje; eseya mimi meesahua cani Eyacuiñajji nijje pea'ai. ²⁷ E'e, ojjaña esejaya ejjashahuabaqui'yojji mimi meemee ajja quea ja'a nee Eyacuiñajji nijje. Jamatii Edojoshahua Pameya eseya jjashahuabaqui meesahua canijo, ojjaña esejaya ejjashahuabaquijji Eyacuiñajji eba nei nei poani. E'e, Edojoshahua Pame jama poani ba'a: —Eyacuiñajji, Jesosaja epeejji cuana huohui'ajja cani ma oya cuana sa poanijo. Jamajjeya jjamaya acue! ¡Miquea ejjashahuabaquijji quea pame nee jayojja jama acue Jesosaja epeejji cuanajo! —jamaya esejo mimiani Eyacuiñajji nijje Edojoshahua Pame.

Eyacuiñajji eseya Jesosa jayojja jama ba'e meesahua cani

²⁸ E'e, jjeya quea camaja Jesosa nijje jjapeequijji. Jamatii Eyacuiñajji eseya babaca canaje ojaya epeejji epoji. Jamajjeya ohuaya eseya jaahuana cani tii tii. Jamaya acani esejaya oya quea jea nee poanijo. ²⁹ E'e, yahuajo nei ese pana jjimahuajo Eyacuiñajji esejo jjashahuabaquinaje jama ba'a: —Ecuea eba a'ya cuae ecuea epeejji poaje quijje nei nei. Eyaya oya cuana ecuea Ebacua Ejja Jesosa jayojja jama ba'e meesahuaquea pame nee —jamaya poanaje Eyacuiñajji.

Jamajjeya eseya Jesosa jayojja jama poanijo, oya esejaya Edoe Mese poaje, eseya Noo. ³⁰ E'e, yahuajo nei nei ese cuaya jjimahuajo Eyacuiñajji babaca ca poa ojaya epeejji epoji. Babaca majje eseya mimishi cuijea'yo mee cani quea ja'a nee, quea ca'a nee Jesosa nijje eyajo, Eyacuiñajji.

Quea pame nee nee Eyacuiñajjiya eseya acani

³¹E'e, eseya Jesosa nijje ba'e tiitije'yo quea ja'a nee o jayojjaya. Quea pame nee nee poaje'yo esejaya ebalejji. Eyacuiñajjiya eseya jaahuana tiitii cani. Oya oe nei quea ca'a nee nee poani tii. Jamajjeya eseya onaa napa canijo, jamatii Jesosaja eseya epajea'yojji pojjeama. ³²Eyacuiñajjiya eseya quea jea nee nee acanijo ohuaya huoojjea canaje ojaya Ebacua Ejja Jesosa esejo manoyohua ese mimishi cuijea'yojji. Jamajjeya eseyaya jama baña ba'a: Eyacuiñajjiya eseya quea jea nee nee atiitii caje'yo; eseya jaahuana tiitii caje'yo pealai. Ohuaya eseya jjapeequi meesahua caje'yo quea ja'a nee Jesosa nijje. ³³Eyacuiñajjiya eseya babaca canaje ojaya epeejji epojji. Jamajjeya pea cuana esejo emimijajiji pojjeama Eyacuiñajji nijje jama ba'a: —Miquea epeejji quea tai. ¡Cajaa acue!

Chojja. Jamaya emimijajiji pojjeama esejo. Eyacuiñajjiya eseya emimishi cuijea'yo ba cani. ³⁴Jesosa Quito manoyonaje eseja mimishi cuijea'yojji. Emanoyojaa Eyacuiñajjiya oya shequi mee ca'o yanaje, nequi mee ca'yonaje o pejjejo eyajo ojjaña huoojeajji. Jomajo oya Jesosa Quito esejo mimiani jama ba'a: —Ecuea epeejji cuana quea bojea poani, emimishi cuijea'yo —Jesosa poani.

Jamajjeya pea ese nijje emimijajiji pojjeama jama ba'a: —Miquianaya shajjama' nei nei poanijo quea nee nee poaje —jama mimijajimeya epojji pojjeama ese nijje, Jesosaja epeejji cuana nijje.

³⁵Eseya Jesosa Quito quea jea nee nee poani e'e jojo nei. Jamajjeya pea cuaa eseya napa caje Jesosa nijje jjapeequianijo; jiquio jama poaje ba'a: Eba'ejji quea camaja poaje. Quea nee, quea mete poaje. Eshahuaja epeejji cuaa quea mimishiya eseya napa caje Jesosaja esohui huohuiji poanijo. Quea shoe nee poaje pojja'a. Quima', aema' poaje pojja'a. Pea cuaa esejaya aquiana sii caje ojjaña pojja'a. Jesosa nijje chacochacoanijo, pea cuaa eseya quecua caje'yo pojja'a. Jamatii esejaya eba e'e jojo nei Jesosa Quito eseya quea jea nee nee, epajea'yojji pojjeama. Ohuaya eseya jaahuana cani. ³⁶Beca cuana yahuajo nei quea mase poa. Jamajjeya ohuaya Jesosaja epeejji cuana quecua ca'ya poa. Jjeya beca cuaa quea mase poaniya eseya quecua sa acani Jesosaja epeejji poanijo. Yahuajo nei nei Eyacuiñajji epeejjiya esohui tehue ca poa. Eyacuiñajjiya esohui etehue'yo jama poani ba'a:

“Eyacuiñajji, ecuana minijje jjapeequianijo pea cuana jjashahuuba majamajaquiani jama ba'a: —Cacuiaealyahua —poani. Jiquio ecua ñajjajja iña majje quecua cani jayojja jama onaaya ecuana acani”.

Jamaya yahuajo nei nei Eyacuiñajji epeejjiya tehue ca poa.

³⁷Dejja mimishi cuana quea huiso nequijo quea camaja nee Jesosa nijje ejjapeequijji. Jamatii pea cuaa eseya ejjapeequi pajea mee'yojji pojjeama Jesosa nijje. Chojja. Eseya Jesosaja quea jea nee poanijo eseya ojaya epeejji poani. Ohuaya eseya jaahuana cani. ³⁸Cuanaya esejaya eba e'e jojo nei Jesosa Quito, Emeshi Mese neija epeejji poanijo, Eyacuiñajji quea jea nee nee poani eseya. E'e, jiquiojo ba'e, manoyo majje pealai eseya Eyacuiñajji quea jea nee. Epajea'yojji pojjeama tii tii. Esohuidojiji cuaa, eshahua cuaa pealai Eyacuiñajji ese pajea

mee'yojji pojjeama. Ojjañaa jjeya nei aniya, ojjañaa quijje nei poajeya peal'ai Eyacuiñajji ese pajea mee'yojji pojjeama tii. Ojjañaa quea taiya quea mimishiya peal'ai Eyacuiñajji ese pajea mee'yojji pojjeama tii. Eseyo ojaya quea jea nee nee poaje'yo tii tii.³⁹ Jesosa Quitoja epeejji poanijo, ojjañaa quea ca'a eyajo nequiya, ojjañaa quea ca'a meshijo nequiya, ojjaña Eyacuiñajji panaa pea'ai Eyacuiñajji eseya epajea mee'yojji pojjeama. Eseyo ojaya quea jea tii tii poaje'yo.

Yahuajo nei Eyacuiñajjiya Isaeni cuana babaca ca poa ojaya epeejji nei epojji

9 ¹Eyaya, Pabohua miquiana que, Jodio cuana huasijje tehueña, ma Shoma cuiñajji ba'e yasijje. Eya Jesosa Quitoja epeejji poanijo ecuea esohui e'e nei poani. E'e, Edojoshahua Pameya eya jjashahuabaqui meesahua cani quea ja'a nee. ²Eya Jodio dejja peal'ai. Jamajjeya eya quea yeno po tiitiiani Jodio cuanajo, Jesosa nijje jjapeequi sa po ajjajo. ³Jodio cuana Jesosaja epeejji epojji eyaya sa neineiaña. Jjashahuabaquiani Jodio cuanajo, ecue huapa pojjeama cuanajo jama ba'a:
—Eyacuiñajjiya eya cajaa ca'a cahua Jodio cuana cuaquí yasijje poqui'yo jjima epoji. Jamaya Eyacuiñajjiya ya'yo jojjemo eya quea bihui nee pome —eya poani.

⁴Yahuajo Eyacuiñajjiya Jodio cuana babaca ca poa ojaya epeejji cuana epoji. Oja bacua cuana po mee ca'ya poa. Eyacuiñajji Jodio cuana nijje nequinajejo, onajaya eba poa Eyacuiñajji ojjaña huoojea'yojji quea ca'a nee poani tii tii. Jodio cuana nijje mimi majamajanaje jama ba'a: “Enijje jjapeequianijo miquianajaya ebacua cuana quea huiso nee poaje. Jiquio meshi eyaya quiaje miquianajaya enequijji, miquianajaya osecua cuana nequijji” Eyacuiñajji poanaje. Quijje Eyacuiñajjiya Moisesi tehue mee ca poa ojaya esohui Jodio cuana quea ja'a nee ba'e meesahuajji. Etiiquiana nijje miminaje jama ba'a: “Miquianaya e'e jojo nei e bihuiajji poajo, eya miquiana nijje mimije” Eyacuiñajji poanaje. Cuanaya Eyacuiñajjiya huohui canaje jama ba'a: “Mique osecua nei quijje poeje; ohuaya miquianaya ba'e tiitii mee caje'yo onijje” Eyacuiñajjiya jamaya Jodio etiiquiana aca poa.

⁵E'e, Jodio cuanaja etiiquiana ma bajjani poa ba'a: Amajama, Amajamaja bacua ejja Isaaca, Isaacaja bacua ejja Jacobo, ma quijje Isaeni bajjani aca poa, Isaenija bacua ejja cuana 12 huisome poa, Jodio cuanaja etiiquiana poa. Jesosa Quito cuaya poa dejja jayojja, yamijji, Jodio ponaja mejo poa. Etiiquianaja osecua poa Jesosa, esejaya etiiquianaja osecua. Jjeya oya ojjaña huoojeajji poani. Jamajjeya joya ejjabihuiaqui tii tii!

⁶Jodio cuana oe pojji cuana Jesosaja epeejji poanaje. Jamajjeya oe pojji cuanaja mimishi ecujea'yo poanaje, Jodio cuanaja. Jamatii esejaya eba Eyacuiñajjiya ojaya ehuohui'yo ma etiiquiana cuana nijje ohua huohui ca poa jayojjaya acani Jesosaja epeejji cuana nijje. Jesosaja epeejji cuana ca ca oe Isaeni dejja e'e jojo nei poani, Eyacuiñajjiya babaca. ⁷Pea cuana ca ca, mimishi cuana ca ca Eyacuiñajjiya Isaenija osecua nisho ba cani. Amajamaja osecua cuana Eyacuiñajjiya babaca'yo beca cuana poanaje. Yahuajo nei nei Eyacuiñajji Amajama nijje mimia poa jama ba'a: “Amajama, Sanaja mejo miquea ebacua Isaaca bajjani poaje. Ojaya osecua

cuana quea huiso nee nee poaje. Oya cuana ca ca mique osecua cuana e'e jojo nei poaje". Jamaya Eyacuiñajjiya aca poa.⁸ Ma esohui ba majje esejaya eba poa ojjaña Amajamaja osecua cuana Eyacuiñajjiya babaca jeyo jjima poa ojaya epeeiji epoji. Amajamaja pea ebacua cuana cuaya poa. Jamatii Eyacuiñajji onajaya osecua cuanajo mimi jjima jama ba'a: "Miquianajaya osecua cuana ecuea ebabaca ecuea epeeiji epoji" jamaya ajjima onaya. Chojja. Oe ebacuajo huohui ca poa Eyacuiñajjiya. Amajamaja ebacua Isaaca bajjanijo ca ca oe jamaya huohui ca poa. Isaaca cuaya jjimahuajo jamaya huohui ca poa Eyacuiñajjiya.⁹ Jama aca poa ba'a: "Amajama, miquea ehuanase etii, bacuama! Jamatii quijje oya o'ejji poaje. Ecuea eba ache shono miquea ebacua cuayaje, dejja shoi. Apoa poajo eyaya miquea ebacua cuaya meeje". Jamaya Eyacuiñajjiya aca poa.

¹⁰Eyaya, Pabohua miquianaya pea esohui huohuije Isaacaja bacua cuanajo. Jamajjeya miquianaya ba meeje ojjaña Amajamaja osecua cuana Eyacuiñajjiya babacajeyo jjima ojaya epeeiji nei epoji. Oe nei babaca ca poa; etiiquiana Isaaca ojaya ebabaca poa. Isaacaja ehuanase Shemeca bajjani poa, oja mejo ebacua becajaa poa, dejja pealai.¹¹ E'e, Shemecaja ebacua becajaa cuaya poa. Ma ebacua cuana cuaya jjimahuajo, mimishi ajjimahuajo pealai, Eyacuiñajjiya huohui ca poa oe ebacua ojaya ebabaca'yo ojaya epeeiji nei epoji, pea cho. Jamajjeya ojjaña ba mee ca poa ohuaya babaca cani coya ohua quea jea ba caje. ¹²Ba majje pojjeama Eyacuiñajjiya ojaya epeeiji epoji babaca cani. Joya ohuaya sa caniya babaca cani. Jamajjeya huohui ca poa enaese Shemeca bajjani ojaya ebacua becajaaajo jama ba'a: "Mique bacuua Esao bajjaniya cashajja'ajja cahua oja chahuaja esohui, Jacoboja" Eyacuiñajjiya aca poa Shemeca.¹³ Eyacuiñajjiya esohui huohuijji yahuajo ojaya esohui tehue mee ca'ya poa jama ba'a: "Ecuea Jacobo quea jea nee nee. Esao ca ca cajaa anaje" Eyacuiñajjiya aca poa.

¹⁴—¿Apiojji shai Eyacuiñajjiya ebionei cuaya cajaa aca'yonaje, ebacua quijje cuaya babaca ca poa? ¿Apiojji shai? Jamaya eseyaya ajjima aña. Jamaya quea pame pojjeama —beca cuana poani.

Chojja. Eyacuiñajjiya quea pame nee nee tii acani.¹⁵ Ohuaya Moisesi huohui ca poa jama ba'a: "Eya beca cuana nijje quea bei poani. Beca cuana eyaya jaahuanaña. Cua eya quea jea aña eyaya babacaña" Eyacuiñajjiya aca poa.¹⁶ Esejaya eba'ejjijo pojjeamajo, esejaya ejjashahuabaquijjiyo pojjeamajo pealai ese nijje quea bei poani Eyacuiñajji. Chojja, ojaya quea jea nee nee poanijo ohuaya eseyaya jaahuana cani, ese nijje quea bei poani pealai.¹⁷ Cuanaya yahuajo nei Ejito emeshi mese Panao bajjanijo Eyacuiñajjiya esohui etehue'yo jama poa ba'a:

"Panao, eyaya miya nequi meeaña Ejito emeshi mese epoji. Eyaya ma dejja cuanaja ba jjima aña mi quea mete po meeiji ejo. Jamaya ojjaña cuana ojjaña meshijo ba'e ba meeje eya e'e nei quea ca'a nee nee poani tii".

Jamaya Panao Eyacuiñajjiya aca poa.¹⁸ E'e, Eyacuiñajji beca cuana nijje quea bei poani. Ojaya mimishi cuana cuijea cani. Pea cuana nijje ca ca chojja, quea bei pojjeama po tiitiiani shajjamajoo. Mimishi pajea mee'yo jjima tii tii acani Eyacuiñajjiya.

¹⁹Jamajjeya beca cuaa huohui'ajja cani jama ba'a: —Eyacuiñajjiya ecuana mimishi pajea meesahua ajja. Jamajjeya ¿apiojji ohuaya tecuea cani ecuana quea mimishi poanijo? Ojaya ejjashahuubaquijji jayojja jama acani ohuaya, de —beca cuana poani.

²⁰Eyaya miquianaya saja'anña jama ba'a: ¡A'a Eyacuiñajji niñebajji! Miquianajaya Eyacuiñajji emimicuiajeanobiajeajji pojjeama. Jama ba'a: Meshimisi iñacajjiya meshimisi pana majje iñaca cani shajjajji acani. ¡A'a meshimisiya tecuea caje meshimisi iñacajji jama ba'a: —¿Apiojji acuaeaya miyaya eya jamaya anaje so'o? —a'a jamaya meshimisiya acani?

Cho, jamaya po ajja meshimisi. ²¹Meshimisi iñacajjiya meshi iña majje ojaya ejjashahuubaquijji jayojja jama acani. E'e pojja'a meshimisi quea bame nee asa acani, yiye bame nee nee a sa acani pojja'a. Ojaya ejjashahuubaquijji jayojja jama pana'yome acani. ²²Jamaya Eyacuiñajjiya acani peal'ai, ojaya ejjashahuubaquijji jayojja jama acani. Beca cuana quea mimishi po tiitiianijo, Eyacuiñajjiya oya cuana quea nee po mee sa acani. Jamajjeya ojjaña ba mee caje Eyacuiñajji quea ca'a nee nee poani. Jamatii oya jjeya nei quea tecue nee pocuaji ajja shajjama' nijje. Chojja, quijje nei quea nee nee po mee caje'yo. Ishoa cani. E'e pojja'a shajjama' cuana Jesosaja epeejji poaje ba'ajja!. Jamajjeya Eyacuiñajjiya oya cuana quea nee nee epo meeji pojjeama. ²³Ese beca cuana nijje ca ca Eyacuiñajji quea bei poani. Jamaya acani eseya ojaya quea jea nee nee poanijo. E'e, Eyacuiñajji quea ca'a nee nee poani; eseya jjapeequi meesahua cani Jesosa nijje. Jamajjeya ohuaya eseya quea ja'a, quea pame nee nee ba'e mee sa acani eyajo Jesosa nijje. ²⁴E'e, Eyacuiñajjiya eseya beca cuana, Jodio cuana, Jodio pojjeama cuana peal'ai babaca canaje ojaya epeejji epojji. Ojaya ejjashahuubaquijji jayojja jama acani, Eyacuiñajjiya. ²⁵Jamajjeya yahuajo nei ojaya esohui huohuijji Osea bajjani tehue mee ca poa jama ba'a:

“Yahuajo nei Jodio pojjeama ecuea ebabaca pojjeama ecuea epeejji epojji. Jjeya ca ca oya cuana ecuea ebabaca ecuea epeejji epojji.

Yahuajo oya cuana ecuea quea jea nee pojjeama. Jjeya ca ca oya cuana ecuea quea jea nee nee poani. ²⁶Jodio pojjeama quea mimishi poanajejo, pea cuaa huohui ca poa jama ba'a: —Miquianaya Eyacuiñajjiya epeejji pojjeama —poanaje. Jjeya ca ca onaaya huohui caje jama ba'a: —Miquianaya Eyacuiñajjiya ebacua cuana poanaje”.

Jamaya yahuajo Eyacuiñajjiya tehue mee ca poa.

²⁷Cuanaya yahuajo nei Eyacuiñajjiya esohui huohuijji Isaiaa esohui tehue ca poa Jodio cuanajo jama ba'a:

“Etiiquiana Isaeni bajjanija osecua cuana quea huiso nee nee poaje. Meshijaji sope huisoajja poaje, sicosico meemee ajja quea huiso nee neejo. Jamatii oe pojji cuanaja mimishi ecuijea'yo poaje. Eyacuiñajjiya oe pojji ba'e tiitii mee caje'yo onijje quea ja'a nee.

²⁸ Ohuaya ojaya esohui jayojja jama acaje'yo. Ojjaña shajjama' cuana quea nee nee po mee jeyojeyo caje'yo onijje jjapeequi sa po'yo ajjajojo. E'e jojo nei jamaya Eyacuiñajjiya acuaji caje".

Jamaya aca poa Isaiaa. ²⁹ Ohuaya pea esohui tehue ca poa jama ba'a:
 "Yahuajo Eyacuiñajjiya quiyo jeyojeyo mee ca'ya poa ojjaña quea mimijjequijea, ojjaña quea mimishi Sonoma cuiñajjiyo ba'e, ojjaña Comosha cuiñajjiyo ba'e pea'ai. Oya jayojja beshahua nei Isaeni cuana chama'yo tii popoquia poa shajjama' poanijojo. Eyacuiñajjiya oe pojji Isaenija osecua cuana jaahuana ca poa".

Jamaya aca poa Isaiaa.

**Jodio cuana Jesosa nijje jjapeequi jjima; Eyacuiñajjiya
 oya cuana ba jjima emimishi cuijea'yo**

³⁰ ¡Jamajjeya bacute jiquio! Eyacuiñajjiya quea huiso Jodio pojjeama ba caje mimishi'ama. Jodio cuana ca ca oe pojji ba caje mimishi'ama. Yahuajo Jodio pojjeama cuana jjashahuabaqui jjima poanaje jama ba'a: —¿Achajja shai ecuana ba'eje Eyacuiñajjiya esohui jayojja jama so'o? Jamajjeya ohuaya ecuana ba caje mimishi'ama —jamaya jjashahuabaqui jjima Jodio pojjeama poanaje.

Jamatii Jesosa nijje jjapeequianijo, Eyacuiñajjiya oya cuana ba cani mimishi'ama. ³¹ Jodio cuana ca ca Eyacuiñajjiya babaca ca poa onijje ejjapeequijji. Jamatii oya cuana jjashahuaba quehuaquinaje jama ba'a: —Ecuana ojjaña Eyacuiñajjiya esohui cuana jayojja jama atiitiañajo, ohuaya ecuana ba caje mimishi'ama —Jodio cuana poanaje.

Cho. Eyacuiñajjiya Jodio cuana ba ca poa quea mimishi ojaya esohui cuana jayojja jama mi atiitii cajo. ³² ¿Yajjajje? ¡Bacute! Eyacuiñajjiya Jodio cuana ba cani mimishi'ama ca ca Jesosaja epeejji poanijo. Jamatii onaaya aje oe Jesosa cajaa acanaje. Jama poa cuana ba'a: —Ecuaya esohui etehue'yo jayojja jama atiitiaña. Jamajjeya Eyacuiñajjiya ecuana mimishi'ama ba caje —oya cuana poa. Chojja de, ajjima ojaya, de.

³³ E'e, yahuajo Isaiaa Eyacuiñajjiya esohui tehue ca'ya poa jama ba'a:
 "Eyaya huoojeaje mimishi cuijeajji Isaeni cuana huasijke. Jamatii Isaeni cuana jjashahuaba quehuaquije; mimishi cuijeajji cajaa acaje'yo.
 Beca cuana onijje jjapeequiajjo ca ca queabihui nee nee poaje'yo".

Jamaya aca poa Isaiaa Isaeni cuanajo, Jodio cuanajo.

10 ¹ Miquianaya Jodio cuana Shomajo ba'e Jesosaja epeejji poanijo ecuea epeejji poani pea'ai. Eya, Pabo Jodio pea'ai. Eya ojjaña Jodio cuanajo mimi tiitiiani Eyacuiñajji nijje jama ba'a: —Eyacuiñajji, ¡Jodio cuana jjapeequi meesahuacue Jesosa nijje! Jamajjeya oya cuana cuaquiyasijke epoqui'yojji pojjeama —jamaya eyaya atiitiaña.

² Ecuea eba ojjaña Jodio cuana Eyacuiñajji epeejji po sa poani. Jamatii onajaya ejjashahuabaquijji quea quehua poanijo Eyacuiñajji nijje jjapeequi meemee aja. ³ Jesosa nijje jjapeequiajjo, Eyacuiñajjiya

Jodio cuana mimishi'ama ba caje, ma yahuajo shajjama' poa. Jamaya beshahua nei ojjaña Jodio cuanaja eba pojjeama. Jesosa cajaa acanaje. Ojaya ejjashahuabaquijji quea quehua jama ba'a: —Quea pame poanijo, Eyacuiñajjiya ecuana ba caje mimishi'ama —jamaya poso jjabaquinaje.

Cho, Eyacuiñajjiya ojjaña ba cani mimishi'ama Jesosa nijje jjapeequianijo, quea pame ba'yanijo pojjeama. ⁴E'e, Jesosa Quito mano'yonaje esejo. Jamajjeya ojjaña onijje jjapeequiani Eyacuiñajjiya ba cani mimishi'ama. Jamatii beshahua nei ojjaña Jodio cuana jjashahuuba quehuaquiani jama ba'a: —Moisesija etehue'yo jayojja jama atiitiiañajo, Eyacuiñajjiya ecuana ba caje mimishi'ama —jama posoya acani Jodio cuaa.

Eyacuiñajjiya ojjaña mimishi cuijea'yo sa acani

⁵Yahuajo nei Moisesiya Eyacuiñajjiya esohui tehue ca poa jama ba'a: “Eyacuiñajjiya eseya ba caje mimishi'ama ojaya esohui atiitiiañajo.

“Jamajjeya ¡ojaya esohui jayojjaya oe atiitiicue!”

Jamaya esohui tehue ca'ya poa Jodio cuanaja yajji.

⁶¡A'a jjashahuuba quehuaquijji jama ba'a: —Eyacuiñajjiya ecuana ba cani mimishi'ama oja esohui etehue'yo jayojja jama aña tiitijo —a'a jamaya jjabaquijji! Chojja, Jesosa nijje e'e jojo nei jjapeequianijo, Eyacuiñajjiya eseya ba cani mimishi'ama.

Eyacuiñajjiya Moisesi esohui jama tehue meeme aca poa ba'a:

“A'a jjashahuabaquijji jama ba'a: —E'e pojja'a beca cuana eyahuasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama”.

Jama tehuemeya aca poa Moisesiya.

Jjamajjeya ¡jamaya a'a jjashahuuba quehuaquijji! Jesosa poeyanaje ese que; mano'yonaje Eyacuiñajjiya ese mimishi'ama ebajji. ⁷Moisesiya pea esohui tehue ca poa jama ba'a:

“¡A'a jjashahuuba quehuaquijji jama ba'a: —Beca cuana emano'yo huasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama —jamaya a'a jjashahuabaquijji!”

Jamaya Moisesiya tehue ca poa.

E'e, jamaya quea jjashahuabaqui quehua. Jesosa shequi o'oyanaje ese mimishi cuijea'yojji epoji. ⁸Jamajjeya Eyacuiñajjiya Moisesi esohui jama tehue meeme aca poa ba'a:

“Eyacuiñajjiya miquianaya ba caje mimishi'ama eba'e tiitii'yojji. Quea camaja nee nee pojjeama. Eyacuiñajji miquianaya mimishi'ama ebajji mimi huicha'a huicha'anaje. Miquianaaya shajja'ajja majamajanaje. Majoya jjashahuabaqui majamajanaje miquianaya”.

Jamaya aca poa Moisesiya. Maya ecuaaya huohuaña miquianajaya eshajja'ajjajji, Jesosa nijje ejjapeequijji. ⁹E'e jojo nei ejjahuohiphi jiquio jama ba'a: —Jesosa ecuea Emeshi Mese nei poani —ejja'aqui. E'e jojo nei

ejjashahuabaqui jama ba'a: —Ecuea eba Eyacuiñajjiya Jesosa shequi mee ca o'oyanaje —jamaya poanijo Jesosaa eseya ba'e tiitii mee caje'yo eyajo onijje.

¹⁰ Jesosajo e'e jojo nei jjashahuabaquianijo, Eyacuiñajjiya eseya ba cani mimishi'ama. Eseyaya e'e jojo nei huohuiaña: —Eya Jesosaja epeejji.

Jamajjeya Jesosaa eseya onijje ba'e tiitii mee caje'yo. ¹¹ Yahuajo nei nei Isaiaa esohui tehue ca poa jama ba'a:

“Ojjaña joya jjeya nei Eyacuiñajjiya huoojea'yo ojjaña jaahuanajji nijje jjapeequiani Eyacuiñajjiya ba cani mimishi'ama e'e jojo nei”.

Jamaya Isaiaa aca poa.

¹² E'e, Jesosa esejaya Emeshi Mese nei oe nei, ojjaña; Jodio cuanaja, Jodio pojjeama cuanaja pea'ai. E'e, Jodio cuana Jodio pojjeama jayojja nei pea'ai. Onijje mimianijo, Jesosaa eseya jaahuanana cani quea pame nee.

¹³ E'e, eseya beca cuana mimije Jesosa nijje jama ba'a: —Jesosa, ecuea Emeshi Mese nei, jecuea mimishi cuana cuijea'yocue! —jamaya mimianijo, Jesosaa esefa mimishi cuijea'yo majje ba'e tiitii mee caje'yo eyajo.

¹⁴ Pea cuanaja Jesosa ba jjima, onijje mimi jjima; emimishi cuijea'yoji pojjeama. Shajja'ajja jjima Jesosa mano'yonaje ojjaña; mimishi cuijea'yoji. Jesosaja esohui huohuiji poqui jjima ona huasijje esohui quea pame Jesosajo huohuuya. ¡Achajja shai oya cuana Jesosaja epeejji poaje so'o? ¹⁵ Eyacuiñajjiya ojaya esohui huohuiji pea cuana huasijje huoojea jjimajo, oya cuana Jesosajo shajja'ajjajji pojjeama. Yahuajo nei Eyacuiñajjiya esohui huohuiji Isaiaa esohui tehue ca poa jama ba'a:

“Eyacuiñajjiya esohui huohuiji poeyajo esohui quea pame huohuuya, ecuana quea bihui nee nee poaje. E'e jojo nei jamaya poaje”.

Jamaya esohui tehue ca poa.

¹⁶ E'e, Eyacuiñajjiya esohui huohuiji poquinaje Isaeni cuana huasijje. Huohui ca'ya poa ojaya esohui quea pame nee. Jamatii Isaeni cuana aje oe shajja'ajja sa po'yo ajja poa. Isaiaa yahuajo nei esohui tehue ca poa Isaeni cuanajo jama ba'a: “Emeshi mese, oe pojji Isaeni cuaa ecuanajaya esohui shajja'ajja canaje” jamaya Isaiaa aca poa.

¹⁷ Eyacuiñajjiya ojaya esohui huohuiji huoojea cani esohui quea pame nee Jesosajo huohuuya. Jamajjeya ma esohui quea pame nee shajja'ajja majje Jesosa nijje jjapeequije'yo. ¹⁸ Jamatii beca cuana jjashahuabaquianijo jama ba'a: —E'e pojja'a Isaeni cuanaja shajja'ajja jjima esohui quea pame Jesosajo. Jamajjeya Jesosa nijje jjapeequi jjima poanaje.

Chojja. Shajja'ajja canaje. Jamatii shajjama' jayojja poanaje. Yahuajo Eyacuiñajjiya esohui quea pame Jesosajo tehue mee ca poa jama ba'a:

“Ojjaña meshijo ba'e yasijke Eyacuiñajjiya esohui huohuiji cuana esohui quea pame huohui mee canaje”.

Jamaya yahuajo nei aca poa Dabiya.

¹⁹ Beca cuana jjashahuuba quehuaquianijo jama ba'a: —E'e pojja'a Isaeni cuanaja Eyacuiñajjiya esohui quea pame shajja'ajja jjima. Jamajjeya mi jjapeequinaje Eyacuiñajji nijje —jamaya beca cuana poani.

Cho. Onaaya shajja'ajja canaje. Yahuajo nei Moisesiya Eyacuiñajjija esohui tehue ca poa jama ba'a:

"Isaeni cuana, miquianaya ebionei ecuea ebabaca coo, eyaya babaca coonaje ecuea epjeeji epoji. Miquiaaya ca mo ca oe cajaa anaje. Jamatii eyaya pea cuana babacaje'yo ecuea epjeeji nei epoji. Jamajjeya miquianaya quea quene poaje ona nijje, Isaeni pojjeama cuana nijje. Jjashahuabaquije jama ba'a: —Isaeni pojjeama cuana quea pame pojjeama. Ecuana ca ca quea pame nee. Eyacuiñaji e'le jojo nei onajaya ba jjima. Ecuanajaya ca ca oya eba. ¿Apiojji shai Eyacuiñajjiya babaca cani Isaeni pojjeama cuana? Oya cuana cajaa —jamaya miquianaya poaje".

Jamaya Moisesiya aca poa Isaeni cuana. ²⁰Majoya Isaiaa Eyacuiñajjija esohui quea ja'a nee tehue ca poa jama ba'a:

"Pea cuanaja eya ba jjima. Eyaya oya cuana jjapeequi meesahuaje'yo enijke. Oya cuana mimi jjima enijke ojaya mimishi cuijea'yojji. Jamatii oya cuana ecuea esohui ba meesahuaje'yo".

Jamaya Isaia tehue mee ca poa yahuajo nei nei. ²¹Eyacuiñajjiya Isaia pea esohui tehue mee ca poa Isaeni cuanaja jama ba'a:

"Eyaya Isaeni cuana iyaa majamajanaje enijke ejjapeequijji. Jamatii ecuea esohui etehue'yo jayojja jama a sa po'yo ajja tii tii.

Shajjama' ojjaña cuana, quea mimishi nee nee".

Jama tecueameya Isaiaa Isaeni cuana aca poa.

Eyacuiñajjija Jodio cuana cajaa ajjima

11 ¹Beca Jodio cuana jjashahuabaquiani jama ba'a: —Ecuana Isaeni cuana. Eyacuiñajjiya babaca. Jamatii jjeya Eyacuiñajjiya ecuana cajaa acanaje —beca cuana jamaya poani.

Chojja de. ¡Bacue! Eya Isaeni dejja, Jodio dejja. Eya Eyacuiñajjiya cajaa ajjima. Amajama ecuea etiiquiana poa. Bejami Amajamaja osecua. Eya Bejamija osecua. ²E'e, Eyacuiñajjiya Jodio cuana babaca coo ca poa ojaya epjeeji epoji. Yahuajo nei Eyacuiñajjiya esohui huohuijji Enia bajjanija esohui etehue'yo miquianajaya eba. Enia Jodio cuanajo quea quene mimia poa Eyacuiñajji nijje jama ba'a:

³ "Eyacuiñajji, Emeshi Mese nei, ¡bacue pea Isaeni cuana! Ohuaya aje oe cuiajea ca'yonaje miquea esohui huohuijji cuana. Mei e'lya ani iñajeaoqueajea ca'yonaje, ma aquiana dahuajji acani cuaa mi quea bei ecuana nijje epoji iñajeaoqueajea ca'yonaje. Eya ee nei yani miquea epjeeji. Eya cuiajea sa acani pea'ai Isaeni cuaa".

Jamaya aca poa Eniaa.

⁴Eyacuiñajjiya Enia saja'a ca poa jama ba'a:

"Chojja. Quea huiso nee Isaeni cuana ecuea epjeeji yani. E'e, 7.000 huisome Isaeni cuana eyacuiñajji nisho Baani bajjani bihuaijji pojjeama. Quea huiso Isaeni cuana ecuea esohui jayojja jama ba'yani".

Jama saja'ameya Eyacuiñajjiya aca poa Enia.

⁵Jjeya nei cuanaya beca Jodio cuaa Eyacuiñajjiya esohui jayojja jama acani. Eyacuiñajjiya oya cuana babaca canaje ojaya epeejji epoiji. Oja mimishijo jjashahuabaqui tiitii ajja. Eyacuiñajjiya oya cuana quea jea nee acani. Jamajjeya oya quea bei nee poani ona nijje, Eyacuiñajji. ⁶E'e, Eyacuiñajjiya Jodio cuana quea jea nee acanjo oya cuana babaca canaje ojaya epeejji epoiji. Quea bei Jodio cuana nijje poanaje. Onaja mimishi cuanajo jjashahuaba tiitioui ajja. Jodio cuana ojaya quea jea nee poanajeojo babaca ca'ya poa. Babaca'yo jjima ojaya esohui jayojja jama atiitii canajejojo.

⁷E'e, beca Jodio cuana Eyacuiñajjiya epeejji pojjeama poanaje. Quea huiso Eyacuiñajjiya esohui jayojja jama anisho canaje. Jamajjeya Eyacuiñajjiya oya cuana ba canaje quea mimishi. E'e, Eyacuiñajjiya Jodio cuana babaca canaje ojaya epeejji epoiji. Beca cuana e'e nei poanaje. Jamatii pea cuana quea mimishi nee nee poanaje. ⁸Yahuajo nei nei Moisesiya Eyacuiñajjiya esohui tehue ca poa jama ba'a:

“Jamajjeya Eyacuiñajjiya shajjama' cuana quea jjashahuabaqui ja'a epo meeji pojjeama. Eyacuiñajjiya etehue'yo e'e nei ba majje jamatii ojaya quea quehua poa. Esohui e'e nei shajja'ajja majje jamatii quea quehua poa pealai. E'e, jamaya Isaeni cuana jjeya pealai shajjama' po tiitiiani”.

Jamaya Moisesiya tehue ca poa.

⁹Yahuajo nei nei emeshi meseya Dabiya Jodio shajjama' cuana tecuea ca poa jama ba'a:

“Esejaya etiiquianaja esohui jayojja jama atiitiaña miquianaaya.

Poquiquehuaje'yo, de, edasia'yo poaje'yo, de, quea mimishi nee nee. Jamajjeya Eyacuiñajjiya miquianaya quea nee nee capo mee cahua. ¹⁰Cojjamaja ejiojji ba jjima jayojja jama miquianajaya ba jjima capoahua tii tii Eyacuiñajjiya ejjashahuabaqui'yojji.

Cuanaya aquiana quea biquie abo tiitii cani jayojja jama capoahua miquianajaya mimishi; epajeal'yojji pojjeama tii tii capoahua”.

Jamaya Dabiya tehue ca poa yahuajo nei nei Jodio cuanajo.

Eyacuiñajjiya Jodio cuana iyaa cani tii ojaya epeejji epoiji

¹¹E'e pojja'a beca cuana jama jjashahuabaquime poani ba'a: —¿A'a Jesosa cajaa acanajejo, Eyacuiñajjiya Jodio cuana cajaa acaje'yo tii?

Chojja, jamaya pojjeama. Ecuana, Jodio cuana quea mimishi nee nee poanijo, Eyacuiñajjiya esohui a'ajjajo, ohuaya Jodio pojjeama cuana jjapeequi meesahua cani Jesosa nijje. Onajaya mimishi cuana cuijea ca'yani. Eyacuiñajji jjashahuabaquiani jama ba'a: —E'e, Jodio pojjeama cuana Jesosa nijje jjapeequi'yo pealai enijje eba'e tiitii'yojji —jamaya Eyacuiñajji jjashahuabaquiani.

¹²Jodio cuana aje oe jjashajja'ajjaqui ajja. Jamajjeya Eyacuiñajjiya Jodio pojjeama cuana Jesosa nijje jjapeequi meesahua ca'yonaje. Eyacuiñajjiya Jodio pojjeama cuana quea pame acanaje Jodio cuana

Jesosa nijje jjapeequi jjima jojoya. Jodio cuana Jesosa nijje jjapee neineiquiajo ca ca Eyacuiñajjiya quea pame nee acaje'yo ojjaña.

¹³Jodio pojjeama cuana Shomajo ba'e, Eyacuiñajjiya eya huoojea canaje miquiana que ojaya esohui huohuiya. Eyaya esohui huohuiña tii tii miquianaya Jesosaja epeejji epo meesahuajji. ¹⁴Jamajjeya ma ba majjeya Jodio cuana pojja'a Jesosaja epeejji po sa poaje'yo pea'ai. ¹⁵E'e, Jodio cuaa Jesosa cajaa aca poajo, Eyacuiñajjiya Jodio pojjeama onijje jjapeequi meesahua canaje. Jamaya quea pame nee. Jamatii quijje Jodio cuana Jesosa nijje jjapeequi meesahua caje'yo pea'ai. E'e, jjeya Jodio emano'yo jayojjaya poani shajjama' jjejojo. Jesosa nijje jjapeequi'yo majje ca ca eshequi'yo jayojja poaje'yo, de, quea pame nee nee. ¹⁶E'e, jjeya oe pojji Jodio cuana Jesosaja epeejji nei poani. Jamajjeya quijje Eyacuiñajjiya quea huiso Jodio cuana ojaya epeejji nei po mee caje'yo. Jama ba'a: Acui esajja quea pame nee poajo, quijje tii majje ejjajja quea pame nee poaje pea'ai. Oya jayojjaya Amajama Eyacuiñajjiya ebabaca poa. Jamajjeya oja osecua cuana Eyacuiñajjiya ebabaca poaje pea'ai.

¹⁷Jjashahuubaquicue jama ba'a: E'acui meseya acui aa enojinoji cobojea majje ejee cojjajji iyanobia cani etii'yojji. Acui sajja quea pamejo pea acui jee cojjajji e'iyanobia pohuaje'yo. Oya jayojjaya beca Jodio cuana Jesosa cajaa acanajejo quea tai poa, acui aa enojinoji jayojja. Pea ejee cojjajji iyanobia majje pohua'yani jama Jodio pojjeama Jesosaja epeejji cuana poaje. Jiquio ecua ecuicojjone sajjajji jayojja eseya quea pame ba'e mee cani. ¹⁸Jamajjeya Jodio pojjeama cuana, ja'a jjashahuubaquijji miquianaya quea pame nee, Jodio cuana quea pame pishana! Chojja. Eyacuiñajji miquianajaya eba poanaje Jodioja ehuhuuijo. Miquianajaya ehuhuuijo pojjeama ca ca Eyacuiñajji Jodio cuanaja eba poa.

¹⁹E'e pojja'a miquianaya jjashahuubaquiani jama ba'a: —Jesosa cajaa aca poajo Jodio cuana acui aa ecobojea'yo jayojja jama poanaje. Eseya, Jodio pojjeama ca ca Jesosaja epeejji poanijo ecuicojjonejo pea ecojja posho e'iyanobia'yo quea pame pohua'yani jayojja jama —miquianaya poani.

²⁰E'e, jamaya poanaje. Jesosa cajaa amajje Jodio cuana acui aa ecobojea'yo jayojja jama poanaje. Eyacuiñajjiya oya cuana cajaa aca poa. Miquianaya ca ca oe Jesosa nijje jjapeequi'yojji, Eyacuiñajjiya ba cani mimishi'ama. E'e, jjeya Eyacuiñajjiya miquianaya babaca canaje. Jamatii ja'a jjashahuubaquijji miquianaya quea pame nee Jodio cuana quea pame pishana! Chojja. ¡Miquianaya quea ja'a nee Jesosa nijje jjapee tiitiiquicue! ²¹¡Bacue oe! Eyacuiñajjiya Jodio cuana babaca coo ca poa ojaya epeejji epoji. Majoya Jodio cuana jjashajja'ajjaqui sa po aijjajo, ohuaya miquianaya babaca canaje, Jodio pojjeama cuana. Jiquio ecua acui aa nojinoji jehuisejjajea'yo majje eyacua iyanobia ca'yani jama jayojja Eyacuiñajjiya Jodio shajjama' cuana cajaa ajea'yo majje miquianaya babaca canaje. Jamajjeya ja'a shajjama' pojji! Eyacuiñajjiya miquianaya cajaa aca chana! ²²E'e, Eyacuiñajjiya ojjaña quea jea nee acani. Shajjama' cuana ca ca tecuea neinei caje'yo, de. E'e, ojjaña joya shajjama' poani ohuaya quea nee po mee caje'yo. Miquianaya ca ca ohuaya quea pame nee acani ojaya quea jea nee neejojo. Ohuaya miquianaya

quea jea nee acaje'yo tii tii, ca jjashajja'ajja tiitiiquiajo. Shajjama' poajo ca ca ohuaya miquianaya quea nee po mee caje'yo pea'ai, de.²³ E'e, Jodio cuana pea'ai Jesosa nijje jjapeequiajo Eyacuiñajjiya ojaya epeejji nei po mee caje o'oya, yahuajo nei nei jayojjaya. E'e nei, jiquio ecua acui aa ejehuisejjajea'yo iyanobia ca o'oyani jama jayojja Eyacuiñajjiya oya cuana acaje'yo; ojaya epeejji nei po mee caje o'oya.²⁴ Miquianaya ca ca Jodio pojjeama cuana yahuajo nei Eyacuiñajjiya ebabaca pojjeama poa. Jamajjeya miquianaya pea acui aa jayojja, ebiojo nequi acui aa jayojja. Jamatii jiquio ecua ebiojo nequi acui aa acui bame bame yasijje iyanobia cani jayojja jama Eyacuiñajjiya miquianaya babaca canaje ojaya epeejji nei epoiji. Jamajjeya Eyacuiñajjiya miquianaya acanaje jayojja jama ohuaya Jodio cuana acaje'yo. E'e, ecuea etiiquiana Eyacuiñajjiya babaca coo ca poa. Jamajjeya jiquio ecua acui ebana'yo acui aa ejehuisejjajea'yo oya tii acujo iyanobia caje o'oya jayojja jama Eyacuiñajjiya Jodio cuana acaje'yo. Jesosa nijje jjapeequiajo Eyacuiñajjiya huohui caje jama ba'a: —E'e Jodio cuana, jjeya miquianaya ecuea epeejji nei po o'yanaje, ojjaña —acaje Eyacuiñajjiya.

Jodio cuana Jesosaja epeejji quijje poaje'yo

²⁵ Ecuea epeejji cuana, eyaya miya huohuije ma Eyacuiñajjiya quijje acaje Jodio cuanajo, ma yahuajo ojjaña ja jjima poa. Jamajjeya ecuea esohui ba majje miquianaya ejjashahuabaquiji pojjeama jama ba'a: —Ecuanaya nei ca ca oe Eyacuiñajjiya ebabaca ojaya epeejji nei epoiji —a'a oe miquianaya pojji.

Chojja. Jjeya Jodio cuaa Emeshi Mese nei Jesosa cajaa acani beshahua nei ojjañaa. Jamaya epo'yojji tii pojjeama. ¿Ache Jodio pojjeama cuana Jesosaja epeejji poaje? Eyacuiñajjiya eba. Mahuiso jjapeequiajo, Jodio cuana jjapeequije o'oya Jesosa nijje.²⁶ Jamajjeya quea huiso nee nee Jodio cuana eyajo ba'e tiitii mee caje'yo Jesosa nijje jjapeequiajo. E'e, yahuajo nei Eyacuiñajjiya Isaia tehue mee ca poa Isaeni cuanajo, ma Jacoboja osecua cuanajo jama ba'a:

“Eyacuiñajjiya huoojea'yo ojjaña jaahuanajji poeje. Oya Jodio dejja poaje. Oya Jacoboja osecua cuana mimishi pajea meesahua'yojji poaje'yo.²⁷ Ma ecua eyaya Jodio etiiquiana huohuinaje jamaya eyaya aje'yo; ojjaña mimishi cuijea neineije'yo”.

Jamaya yahuajo nei nei Eyacuiñajjiya aca poa.

²⁸ Jamatii jjeya Eyacuiñajjiya Jodio cuana ba cani ojaya epeejji pojjeama Jesosa cajaa aiji poajojo. Jamajjeya Jodio cuaa ma esohui cajaa acajo, Eyacuiñajjiya esohui quea pame nee Jesosajo miquianaya shajja'ajja mee canaje, Jodio pojjeama cuana. Jamatii Eyacuiñajjiya Jodio cuana cajaa tiitii ajiima, de. Yahuajo nei ecuana ojaya ebabaca poa. Ohuaya ecuanaja etiiquiana huohui ca poa jama ba'a: “Miya, miquea osecua cuana pea'ai ecuea epeejji nei cuana poaje'yo tii tii” jamaya ohuaya Amajarma, Jacobo, Isaaca pea'ai huohui ca poa.²⁹ E'e jojo nei Eyacuiñajjiya ojaya esohui jayojja jama acaje'yo, epajeal'yojji

pojjeama tii tii. Babaca'yo majje cajaa ya'yoji pojjeama tii.³⁰ Jamajjeya jjeya Jodio cuana Jesosa nijje jjapeequi sa po'yo aija jojoya Eyacuiñajjiya miquianaya, Jodio pojjeama cuana quea bei nee acani. Miquianaja mimishijo jjashahuuba tiitiiqui aija, jamatii yahuajo shajjama' nei poa.³¹ Eyacuiñajjiya quijje Jodio cuana jama acaje'yo ba'a: Jjeya ohuaya miquianaya quea bei acani; miquea mimishijo jjashahuabaqui aija. Oya jayojjaya quijje ohuaya Jodio cuana acaje'yo, jamatii jjeya shajjama' nei poani.³² Jamajjeya Eyacuiñajjiya ojjaña cuana ba cani shajjama' nei nei. Jesosa nijje jjapeequiajo ca ca ojjaña mimishijo jjashahuuba tiitiiqui aija poaje. Quea bei ojjaña cuana nijje poaje'yo Eyacuiñajji.

Eyacuiñajji bihuia cani Pabohua

³³ Quea pame nee nee Eyacuiñajjiya eseya acani. Ojjaña eseya ojaya eba nei nei; oya esejaya mimishi cuijear'yojji. E'e jojo nei ojjaña ojaya eba nei nei. Quea ja'a nee nee ojaya ejjashahuabaquijji. Quea pame nee nee ohuaya acani ojjaña.³⁴ Yahuajo nei Eyacuiñajjiya Isaia tehue mee ca poa jama ba'a:

“¿Ajea eba nei nei Eyacuiñajjiya ejjashahuabaquijji? ¿A'ya shai o ba meesahuajji? Chama' nei nei. Oya oe nei quea jjashahuabaqui ja'a nee nee.³⁵ ¿Aya acuae jja mi oe che quia cani aquiana Eyacuiñajjiya? Ojjaña aquiana cuana ojaya, de”.

Jamaya Eyacuiñajjiya esohui Isaiaa yahuajo nei tehue ca poa.

³⁶ E'e, Eyacuiñajjiya ojjaña aquiana pana ca'ya poa. Ojjaña ojaya aquiana. Quea sohui poja nee neeya jjejojo ohuaya ojjaña quea pame amee cani. Jamajjeya ojjañaa ba cani oya quea ja'a nee, quea pame nee nee pea'ai: —Eyacuiñajji, miya quea pame nee. Pea chama' mi jayojjaya —jamaya ioya ejjabihiua tiitiiqui! ¡Jamaya ejja'aqui!

¡Jesosaja epeejji poanijo ojaya esohui jayojja acue!

12 ¹ Jamajjeya ecuea epeejji cuana, ¡shajja'ajjacue mo! Eyacuiñajji ese nijje quea bei poani, mimishijo jjashahuuba tiitiiqui aija. Jamajjeya ioyer ojaya epeejji nei nei ba'ecue! ¡Eyacuiñajji bihuacue jama ba'a: —Eyacuiñajji, eya miquea nei nei. Miquea ejjashahuabaqui'yojji jayojja jama eyaya aje'yo —jamaya pocue! E'e, ¡Jesosa jayojja jama ba'e tiitiicue quea pame nee! Eyacuiñajji bihuacue jama ba'a: —Eyacuiñajji, miya quea pame nee nee.

² ¡A'a Eyacuiñajjiya epeejji pojjeama jayojja pojji! ¡Eyacuiñajjiya eseya ojaya esohui jayojja jama capo mee cahua! Cajjashahuabaqui mee cahua o jayojja. Majoya ojaya ejjashahuabaquijji eseya ba mee caje'yo. Ma ese ohua amee caje'yo ojo ohuaya eseya ba mee caje'yo. Ojaya ejjashahuabaquijji quea pame nee nee, quea ja'a nee nee enequi tiitijji pea'ai.

³ Eyacuiñajjiya eya huoojea canaje ojaya esohui huohuiya. Jamajjeya eyaya miquianaya ba meesahuaña quea pame nee eba'ejji. E'e, Eyacuiñajjiya eseya ba'e meesahua cani ojaya epeejji epoji. Jamajjeya ja'a jjashahuabaquijji jama ba'a: —Eya quea pame nee nee —a'a jamaya pojji!

Chojja, ¡quea bei nee jjashahuabaquicue! ¡Jama acue ba'a: —Eyacuiñajjiya eya chaco meesahua cani jayojja jama eyaya onijje chacoje —jamaya pocue!

⁴ ¡Bacue! Esejaya eyami oe. Jamatii esejaya eyamijo yani eme', ejiojji, ecojja, equise pealai. Eme' ca ca ecojja jama pojjeama; pea. Jamatii ojee chaco cani oe eyamiya. ⁵Oya jayojjaya eseya Jesosaja epeejji cuana quea huiso nee. Oe epeejji pea jayojja chacochaco ajja. Jamatii eseyaya ojee chacoña Jesosa nijje. ⁶Jesosa nijje jjapeequianijo, Eyacuiñajjiya eseya chaco meesahua cani quea pame ojaya echacojjijo. E'e, ohuaya beca cuana chaco meesahua cani oe echacojjijo. Pea epeejji chaco meesahua cani pea echacojjijo, de. Jamajjeya ¡ohuaya chaco mee cani jayojja jama ejja'aqui! Jamajjeya ¡quea ja'a nee ejjasohuihuohuiqui, ohua huohui mee cani jayojja jama ejja'aqui! ⁷Beca cuana ca ca ona ba'e meesahuajji po mee cani ohuaya. Jamajjeya ¡quea bihui nee ojjaña caba'e meesahua cahua! Jesosaja epeejji sohui bameejji ohuaya po mee canijo, ¡ojjaña esohui caba meesahua cahua, huea'ama capoahua! ⁸Ona jjabahuejjaquijji po mee canijo, pea epeejji cajjabahuejjaqui mee cahua quea ja'a nee: —Eyacuiñajjiya miya quea bihui po mee caje mimishi'ama ba'yanijo —cahuohui cahua cuana.

Eyacuiñajjiya Jesosaja epeejji beca cuana quea aquiana huiso po meesahua cani pealai. Jamajjeya quea bihui nee capoahua, nishehui'ama, dejja tai'ama. Beca cuana pea epeejji jaahuanajji po mee cani. Jamajjeya e'e jojo nei quea ja'a nee nee cajjashahuabaquiahu. Pea epeejji ca ca aema' cuana, emanooja cuana jaahuanajji po mee cani. Jamajjeya quea jea nee cajaahuana cahua Jesosaja epeejji cuana.

¡Jesosaja epeejjiya pea epeejji cuana quea jea nee acue!

⁹ ¡E'e jojo nei ojjaña cuana quea jea nee nee acue! Jamajjeya ja'a pea cuana quea tai ajji! Chojja, ¡ojjaña cuana quea pame nee nee acue! ¹⁰E'e, ¡ojjaña Jesosaja epeejji quea jea nee acue! ¡Miquea huapa pojjeama jayojja jama quea jea nee neeya acue! ¹¹Jamajjeya ¡quea ja'a chacocue huea'ama! ¡Jesosajo, Emeshi Mese neijo quea bihui nee acue ojaya yajjijo! ¹²Eyacuiñajjiya esohui ese nijje jayojja jama ohuaya acaje'yo e'e jojo nei. ¡Jamajjeya quea bei pocue! Quea yeno dejja mimishiya mimia cajje ja'a oe Jesosa pajea'yojji quea yeno po majje! ¡Eyacuiñajji nijje mimi tiitiicue jama ba'a: —Eyacuiñajji, ¡jeya jaahuanacue! ¡Eya ba'e meesahuacue quea ja'a nee! —jamaya pocue Eyacuiñajji nijje!

¹³ ¡Jesosaja epeejji aema' poanijo eba'e meesahuajji quiacue! Pea cuana miquea cuiñajjijo nequiñaaqui'yajo, ¡iyacue bobo ijijajji, ecahuijji pealai! ¹⁴Jesosaja epeejji, dejja mimishiya miya mimia cajje ja'a panajajiji! ¡Eyacuiñajji nijje mimicue jama ba'a: —Ecue Chii, ¡e cuiajji epo mique Bacua Ejja Jesosa nijje jjapeequi meesahuacue! —acue!

¹⁵ ¡Joya quea bihui nee poani onijje quea bihui pocue! Quea yeno poanijo, pa'anijo ca ca ¡onijje mimicue; yeno'ama tii tii po meecue! ¹⁶¡Mi jayojjaya Jesosaja epeejji cuana quea pame nee ba'e meesahuacue! ¡A'a jama jjashahuabaquijji ba'a: —Onajaya aquiana quea pame nee nee. Eya o jayojjaya poaje —a'a jama jjashahuabaquimeya pojji!

¡Aema' cuana a'a cajaa ajji! Chojja. ¡Jjapeequicue onijje! ¡A'a jjashahuabaquijji miya quea pame nee nee, pea cuana quea pame pishana! ¹⁷Onaa miya quea mimishi acajje ja'a onijje quea mimishi pojji! ¡Quea pame nee po tiitiicue ojjañaja ebajji miya e'e jojo nei Jesosaja epeejji poani! ¹⁸Quea camaja eba'ejji pojja'a. Jamatii ojjaña nijje quea bei nee ba'ecue! ¹⁹Onaa napa cajje ja'a jjashahuabaquijji jama ba'a: —Ohua e acanaje jayojjaya eyaya oya aje, de —a'a jamaya pojji!

Chojja. Eyacuiñajjiya casosequia ca'yahua. Jamaya Eyacuiñajjiya esohui etehue'yo poa ba'a:

“Ecuea epeejji napajji poani eyaya eyaye nei sosequiaje'yo; quea nee nee po meeje'yo. Eyaya, Emeshi Mese neiya jamaya huohuiaña”. Yahuajo nei jamaya Eyacuiñajjiya tehue mee ca poa. ²⁰Pea tehue mee ca poa jama ba'a:

“Mi napajji poani cuana quea shoe poajo, ¡bobiacue oe! ¡Quea naba taja poajo, ena quiacue! Miya jamaya aije oya quea bicho nee nee poaje. Miya napa pajea caje'yo pojja'a, miquea epeejji poaje”.

Jamaya yahuajo tehue ca poa Eyacuiñajjiya esohui.

²¹ ¡A'a jjashahuabaquijji jama ba'a: —Ojjaña joya ecuana nijje quea mimishi poani eya o jayojjaya poaje pea'ai, de —a'a jamaya pojji!

Chojja. Miya napa cajje ¡jamati oya cuana quea pame nee acue!

Jesosaja epeejji cuaa emeshi mese cuana cashajja'ajja cahua

13

¹Emeshi meseya huoojea canijo, ¡jjashajja'ajjaquicue! Emeshi mese cuana Eyacuiñajjiya huoojea canaje ojjaña cuana quea ja'a ba'e meesahuaa.

Jamajjeya emeshi mese cuana Eyacuiñajjiya quea ca'a po mee cani ese huoojeajji.

²Jamajjeya jjashajja'ajjaqui ajjajo ca mi ca oe Eyacuiñajjiya miquianaya ba cani shajjama' ojaya ehuoojea'yoja esohui shajja'ajja sa po ajjajo. Shajjama' cuana aje oe quea nee po mee caje'yo. ³Eyacuiñajjiya emeshi mese cuana huoojea jjima quea pame ba'yani cuana quea mete po meeya. Quea mimishi ba'yani cuana ca ca quea mete capo mee cahua. ¿A'a miya emeshi mese cuanajo mete'ama ba'e sa poani?

¡Quea pame acue, ojaya esohui jayojja! Jamajjeya oya minijje queabihui nee poaje pojja'a: —E'e, ¡jamaya quea pame nee acue! —oya poaje.

⁴E'e, Eyacuiñajjiya emeshi mese cuana huoojea canaje ese quea ja'a ba'e meesahuaa. Jamajjeya ¡quea mimishi po majje quea mete pocue ojo! Ohuaya miya jjabahuejjaqui mee caje. Jamaya Eyacuiñajjiya oya cuana huoojea cani shajjama' cuana jjabahuejjaqui meeji. ⁵Jamajjeya ¡emeshi mese cuana shajja'ajjacue mete'ama eba'ejji, Jesosaja epeejji quea pame nee epoji pe'a'i! ⁶¡Jamaya pea'ai oya cuana sosequiacue! Ojjaña quea pame ba'e mee cani sosejje emeshi mese sosequia cani cuaa, Eyacuiñajjiya huoojea. ⁷Jamajjeya: —¡Sosequiacue mo! —ohua acajje ¡jamaya quiacue emeshi meseja eba'e meeji ohua chaco cani sosejje, mahuiso tiiya! ¡Miya jaahuana canijo, miquea meshi cuiña canijo pea'ai, sosequiacue! ¡E'e, emeshi mese cuana shajja'ajjacue! ¡Oya cuana sosequiacue pea'ai! ¡Jama acue pea'ai ba'a:

—Emeshi mese, miya quea pame nee ecuana ba'e meesahuaña —acue!
Jamaya quea pame nee.

¡Jesosaja epeejji cuana quea jea acue; pea cuana nijje quea bei pocue!

8 Jamajjeya ¡aquiana jjeshe majje sosequiacue! E'e, ¡miyaya yahuajo huohui'yonaje jayojjaya sosequiacue! Eyacuiñajjiya eseya quea jea nee nee acani. Jamajjeya ¡pea cuana quea jea nee acue, ojjaña! Pea cuana quea jea nee añajo Eyacuiñajjiya esohui jayojja aña. 9 E'e, Eyacuiñajjiya esohui Moisesiya tehue ca poa jama ba'a:

“¡A'a onajaya ehuanase jea bajji! ¡A'a pea quecuajji! ¡A'a sii pojji! ¡A'a onajaya aquiana jea bajji!”

Quijje Eyacuiñajjiya huohui canaje jama ba'a:

“¡Minijje ba'e quea jea nee acue! ¡Miya quea pame ba'yani jayojja jama ba'e meesahuacue!”

Jamajjeya ¡pea cuana quea jea nee añajo ba'e meesahuacue! ¡Ojjaña Eyacuiñajjiya esohui jayojjaya jama acue! 10 E'e, onaya miquea quea jea nee poanijo oya cuana quea yeno, quea nee po mee sa po'yo ajja. Jamajjeya onaya quea jea nee poanijo ojjaña Eyacuiñajjiya esohui jayojjaya aña.

11 E'e, ¡jamaya Eyacuiñajjiya esohui jayojja jama acue! ¡Bacue jiquio! Jesosa esejaya Emeshi Mese nei jjeya nei pojal'a poeje o'oya. Jamajjeya ¡quea ja'a nee ba'ecue Eyacuiñajjiya esohui jayojja! ¡A'a quea huea pojji! ¡Ojaya esohui bacue! Yahuajo pishana eseya Jesosaja epeejji poanaje. Ohuaya esejaya mimishi cuijea ca'yonaje. Poe o'oya majje eseya ba'e tiitii mee caje'yo eyajo onijje, Jesosaa.

12 Jjeya eseya jiquiojo ba'yani quea camaja poani, mecajje quea misi quea poqui camaja jayojja. Jesosa poe o'oyajo ca ca quea pame nee nee poaje'yo. Epojja jayojja jama poaje'yo. Ojaya epoe o'oyajji beshahua nei apoa. Jjapojjaqui majje ja'a laja'a poani jayojja poaje. Jamajjeya ja'a quea mimishi pojji! ¡Pea jjashahuabaquime po'yocue! ¡Jesosaa eseya ba'e meesahua canijo, ojjaña mimishi pajea neinei'yocue! 13 E'e, ¡quea ja'a nee nee ba'ecue bicho'ama epojji onaa ba canijo! Jamajjeya ja'a huoojjii! ¡A'a ona ishi'ishiqui yasijje poquijji! ¡A'a pea epona cuana jea bajji! Epona, ja'a onaja yahue, shacuima' nequi cuana pea'ai sijiji! ¡A'a quea mimishi ba'ejji! ¡A'a quea quene pojji! ¡A'a jjamimicuiajea nobiajeaquijji peal'ai! 14 Chojja. ¡Jesosa nijje mimicue ojaya ejjashahuabaquijji jayojja jama eba'e meesahuajji! Jamajjeya miquea ejjashahuabaquijji yahuajo nei jayojja jama eshahuaja miya eba'e mee'yojji pojjeama.

¡A'a Jesosaja epeejji cuana nijje mimijajiji!

14 1 Jesosaja epeejji cuana, miquianaaya pojja'a Eyacuiñajjiya esohui quea ja'a nee baña. Jesosaja epeejji beca cuana ca ca quea jjashahuabaqui ja'a pishana. ¡Jamatii onijje jjapeequicue quea bei! ¡A'a mimicuiajeanobiajeajji ojaya esohui quea quehuajol! 2 E'e, miquianaya beca cuana jjashahuabaquiani jama ba'a: —Ojjaña noe cuana ca'lijjiahua, jamatii onaaya ba'ehuana canaje

ecuiquiaja e'ijjiajji nisho. Ecuaaya ijja'yajo Eyacuiñajji cuana nijje quea quene pojjeama poaje —jamaya beca cuana poani. Jamajjeya noe ijjaña, ojjaña.

Beca cuana ca ca jama poani ba'a: —Chojja, ¡noe ma onaaya ecuiquiaja e'ijja'yoji nisho ba'ehuana canaje a'a ijjiajji! Ma eseya ijjaijo Eyacuiñajji quea quene poaje ese nijje —jama posoya acani. Jamajjeya acuijjajja cuana, bobi ebana'yo pea'ai ijja cani; noe ijja'yо jjima acani quea meteya jjejojo.

³Noe ijjiajji cuana, ja'a jama pojji pea cuana nijje ba'a: —¿Apiojji acuae miquianaaya acuijjajja, ebana'yo oopana ijjaña, noe ijja ajja so'o? Chojja. ¡A'a quea mete pojji! —a'a jamaya ajji!

Oya jayojja noe ijja ajja cuana, ja'a pea cuana nijje jama pojji ba'a: —Miquianaaya aje oe noe ijjaña. ¿Apiojji? Eyacuiñajji quea quene po chana', de —a'a jamaya ajji!

¡Bacue! Eyacuiñajjiya noe ijjiajji cuana pea'ai ojaya bacua cuana po mee canaje. Jamajjeya ja'a jamaya pea cuana nijje mimijji! ⁴E'e, miquianaya noe ijja ajja jjejojo mimimimiani. Eyaya miquianaya huohuaña jama ba'a: Eyacuiñajji ona huoojeajji poani, miquianaya pojjeama. Jamajjeya ja'a mimijajji! Eyacuiñajji ona huoojeajji poanijo ohuaya ohuaye nei jama acaje ba'a: —E'e, miquianaya quea pame nee ba'yani —Eyacuiñajjiya acaje.

Quea ja'a ba'e ajjajo ca ca: —Chojja, ja'a jamaya ajji! Quea tai —Eyacuiñajjiya acaje. Eyacuiñajji ese huoojeajji quea ca'a poanijo, ohuaya eseya quea ca'a po mee cani ojaya ejjashahuabauquijji jayojja jama eba'ejji.

⁵Cuanaya beca cuana jama poani ba'a: —Beca epojja cuana Eyacuiñajji bihuiajji. ¡Ma epojja cuanajo a'a chacojji!

Pea cuana ca ca jama poani ba'a: —Ojjaña epojja oya jayojjaya, pea epojja jayojjaya. ¡Eyacuiñajji bihuiaque ojjaña pojjajo! —oya cuana poani.

Jamajjeya ja'a pea nijje mimijji ache epojjajo chaco cajji! ¡Miquea ejjashahuabauqui'yoji epojja cuanajo jayojja jama acue! Pea cuana ojaya ejjashahuabauquijji jayojja jama ca'a cahua pea'ai epojja cuanajo. ⁶E'e, Emeshi Mese neija esohui jayojja jama ba'e sa poani miquianaya, ojjaña. Beca cuana quea huiso epojja cuanajo chacochaco ajja Eyacuiñajji bihuia poani jjejojo. Pea cuana ca ca oe pea epojjajo jayojjaya jama acani, oya jayojjaya. Noe ijjiajji cuaa esejaya Emeshi Mese nei bihuia cani. Ijjial'ijja jjimahua Eyacuiñajji nijje mimiany jama ba'a: —Eyacuiñajji, ecue Chii ai, eyaya miya bihuiaña noejo.

Noe ijja pojjima' cuaa esejaya Emeshi Mese nei bihuia cani pea'ai jama ba'a: —Eyacuiñajji, ecue Chii ai, eyaya miya bihuiaña jiquio bobijo, acuijjajjajo, eso' cuanajo, ebano'yojo cuanaya. E'e, miyaya ojjaña tii meesahua'yonaje —jamaya acani ohuaya.

⁷Jamajjeya ja'a esejaya eba'ejji, eseya sañajo jjashahuaba tiitiiquijji! Eseya eshe nequijo ca ca Jesosaja esohui jayojja jama caba'yahua. Mano'yajo pea'ai eseya Jesosaa jaahuana caje'yo. Eseya ojaya tii poaje'yo. ⁸E'e, eshe nequiya eseyaya Emeshi Mese nei Jesosaja esohui jayojja aña. Mano'yo majje onijje ba'e tiitiije'yo. Jamajjeya eshe nequi, mano'yajo pea'ai ohuaya eseya jaahuana cani; ese huoojeajji

poani tii tii oya. ⁹ Jesosa mano'yo majje shequi o'oyanaje ese jaahuanaji epojji. Jamajjeya ese eshe nequi, mano'yajo pea'ai oya, Jesosa esejaya Emeshi Mese nei poani tii tii. ¹⁰ Jesosaja epeejji poani ojjaña eseya. Jamajoya ¿apiojji acuaeya Jesosaja epeejji quea ja'a nee nijje jjamimicuiajea nobiae aquiani so'o? Cuanaya epeejji quea ja'a nee poaniya, ¿apiojji miquianaaya Jesosaja epeejji cuana niñebaña so'o? Oya Jesosaja epeejji pea'ai. ¡A'la pajeal'yojji quijje eseya ojjaña nequije Eyacuiñajji nequi cojja nei! Ohuaya huohui caje jama ba'a: —E'e jamaya, miyaya quea pame anaje —acaje'yo. Quea pame pojjeama añajo ca ca pea nijje jama poaje ba'a: —Chojja, miya quea mimishi poanaje —acaje'yo Eyacuiñajjiya.

¹¹ Eyacuiñajjiya esohui etehue'yo jama poani ba'a:

“Eya Eyacuiñajji eshe tii tii nequi. Jamajjeya e'e jojo nei ojjaña e cojja nei nequi majje, ecui'oshajjajo nequioque majje eya bihuia caje jama ba'a: —Miya ca ca oe Eyacuiñajji quea ca'a nee, quea pame nee enequi tii tii —ojjaña poaje”.

Jamaya esohui etehue'yo poani. ¹² Jamajjeya e'e jojo nei o cojja nei nequiajo, Eyacuiñajjiya eseya ojjaña huohui'ajja caje esejaya eba'e'yojjijo. Quea ja'a ba'enajeya eseyaya oya saja'aje'yo queabihui. Quea ja'a pojjeama ba'enajeya ca ca quea mete saja'aje'yo.

¡Ona quea mimishi po meeiji a'a pojji!

¹³ E'e, Eyacuiñajjiyo quea pame nee chacoañajo jojaya pea epeejji cuana a'a niñebajji! Chojja, ijama acue ba'a: —Jesosaja epeejji quea jjashahuubaqui ja'a po jjima ecuea eba'ejji ba majje quea mimishi po chana'. Jamajjeya eyaya maya e'amajjaji pojjeama oya quea mimishi, quea mete nee epo meeiji pojjeama —jamaya pocue!

¹⁴ Esejaya Emeshi Mese neiya eya ba meesahua canaje jama ba'a: Noe ma onaja ba'ehuanaqui ecuiquiaja e'ijjajji nisho eseya ijjiago, Eyacuiñajji ese nijje quea quene pojjeama poani. Pea bobi eseya ijjiago, jamaya pea'ai poani. Jamatii Jesosaja epeejji beca cuana quea jjashahuubaqui ja'a pishana jama poani ba'a: —Ma noe, bobi pea'ai eseya ijjiago, Eyacuiñajji quea quene poaje ese nijje —jama posoya acanijo, ohuaya maya ijjiia jjima ca'a cahua. E'e, jamaya jjashahuubaquianijo ijjiia majje oya quea mimishi poani.

¹⁵ Miquianaya, noe ijjiajji cuana, jjashahuubaquicue Jesosaja pea epeejji cuanajo, ma acuijjajja oopana ijjiajjijo! Jamajjeya miya noe ijjiajji ba majje ohuaya ijjiia pea'ai ca chana', mi jayojjaya poaje. Jamatii oya cuana quea mete jjashahuubaquije jama ba'a: —¡Dee! Eyaya eshahuaja bobi ijjianaje. Eyacuiñajji enijje quea quene poaje —jamaya jjashahuubaqui majje Jesosaja epeejji quea mimishi po chana'.

Jamajoya jama acue ba'a: ¡Jesosaja pea epeejji cuana quea jea acue! Oya ca'a'ama; quea mimishi po o'oya mee chana'. Jesosa onajo mano'yonaje pea'ai. Jamajjeya joya cuana jaahuanacue! ¹⁶ Miquianaya jjashahuubaquianyi pojja'a jama ba'a: —Eyaya jamaya aña, quea ja'a nee aña.

Jesosaja epeejji quea ja'a pojjeama jjashahuabaquiani mi ba majje jama poani ba'a: —Chojja, jamaya quea mimishi, quea tai —poso acani.

Jamatjeya ohua jamaya huohui canijo, ja'a oe jamaya amajajji, jamatii miquianaya quea ja'a jjashahuabaquiani! ¹⁷Bobijo, e'ishijji peal'ajo jjashahuabaquianijo pojjeama eseya Eyacuiñajji yasijje, ojjaña huoojoe'yojji poani yasijje poquije'yo. Chojja. Quea ja'a nee, quea bihui nee, quea bei nee pea'ai caba'yahua Edojoshahua Pameya eseya ba'e meesahua canijo. ¹⁸E'e, jamaya Jesosa Quito nijje ba'yanijo Eyacuiñajjiya eseya huohui caje jama ba'a: —E'e, jamaya quea pame.

Cuanaya ojjaña mijo huohui caje jama ba'a: —Oya Jesosa Quitoja epeejji quea ja'a nee nee poani —acaje.

¹⁹Jamatjeya jjashahuuba tiitiuquicue ojjaña Jesosaja epeejji cuana nijje quea bei nee eba'ejjii! ¡Pea Jesosaja epeejji cuana quea ja'a po meesahuacue peal'ai! ²⁰¡A'a noe ijijajji ecuquiaja e'ijijajji nisho onaja ba'ehuana ba'e! Quea mete oya cuana poaje. Eyacuiñajji onijje quea quene poani posojo ma bobijo onaya quea mete poanijo, ja'a ijija majajji! Jamatii Eyacuiñajji pana ojjaña bobi quea pame. Jamatii ma bobi miya ijijajo onaya quea mete po mee chana', quea mimishi po o'oya mee chana!. ²¹E'e, e'e pojja'a Jesosaja pea epeejji quea mimishi poaje miyaya ma bobi ijijaña, acuijjajja na biso nei pojja'a ishiaña ba majje. E'e pojja'a mi ba majjeya ohuaya quea mimishi acaje o'oya. Jamajjeya ja'a jamaya amajajji! Oya quea mimishi po o'oya chana!. ²²Jamatjeya ja'a Jesosaja pea epeejji cuana nijje jjamimicuiae nobiajeaquijji bobi cuanajo, eba'e meejjii cuanajo peal'ai! ¡Jjashahuuba neineiqui majje quea pame nee nee acue! ¡Jesosaja epeejji cuana quea pame ameesahuacue peal'ai! Jamaya poanijo ojjaña Jesosaja epeejji quea bihui nee capoahua. Jesosaja epeejji quea mimishi po mee cani o ba majje ca ca cajjashahuabaquiahua jama ba'a: —Chojja, eya ona mimishi pomeejji poani. Jamaya eya quea tai poani.

²³E'e pojja'a Jesosaja epeejji jjashahuabaquiani jama ba'a: —E'e pojja'a jiquio bobi eya ijijañajo, Eyacuiñajji enijje quea quene poaje —poani.

Jamatjeya jamatii ijija cajo, Eyacuiñajji onijje quea quene poaje.

E'e, jjashahuuba neineiquicue Eyacuiñajji esohui jayojja jama yajji! Eba'e quea mimishi miquea eba. Jamajjeya ja'a jamaya aiji! ¡E'e jojo nei quea pame nee pocue!

¡Jesosaja epeejji cuana quea jjashahuabaqui ja'a ejjapo meequi!

15 ¹E'e, ecuana quea jjashahuabaqui ja'a, Eyacuiñajji esohui ba neineiaña. Beca cuana cho, quea jjashahuabaqui ja'a pishana. Ona nijje ja'a quea quene pojji! ¡A'a jjashahuabaquijji jama ba'a: —Eyaya ca eya ojjaña bobi ijijaje, jamatii onaaya eya quea mimishi poani poso acani —a'a jamaya pojji!

²Chojja, ¡Jesosaja epeejji ca'a'ama nijje a'a jjamimicuiae nobiajeaquijji bobijo! ¡Oya cuana quea bei po meesahuacue miquea ojjaña bobi ijijaña jjimahuajo! E'e, ¡Jesosa nijje jjapee neinei sahuameequicue! ³Jamatjeya ¡Jesosa jama ba'ecue, miquea ejjashahuabaquijji jayojja jama pojjeama! Ohuaya oja

chii jama acanaje ba'a: —Ecuea ejjashahuabaquijji jayojja jama a sa po ajja. Chojja ecue chii, eyaya miquea ejjashahuabaquijji ejo jama a sa aña.

Yahuajo nei onaaya Jesosaja esohui tehue ca poa jama ba'a:

“Ecue Chii, eya miquea ejjashahuabaquijji jayojja jama poanijo, dejja cuaa miya niñeba cani, eya pealai niñeba cani quea tai nee”.

Jamaya esohui yahuajo nei etehue'yo poa.

⁴Ecacuiñajjiya ojjaña ojaya esohui yahuajo tehue mee ca poa eseya ojaya epreejji quea ja'a epo meesahuajji. Ma esohui etehue'yo eseyaya baña onaa napa cajje ona nijje mimijaji ajja, eseya. Ma esohujo pealai eseyaya baña Jesosa nijje jjapee neineiquianijo quijje ba'e tiitijje'yo onijje eyajo.

⁵E'e, Ecacuiñajjiya eseya ba'e meesahua cani ojaya epreejji nei. Onaa napa cajje jjapeequi pajea'yo ajja. Jamajjeya eya onijje mimiani miquianajio jama ba'a: —Ecue Chii, ¡miquea epreejji cuana Shomajo ba'e ojee jjapeequi meesahuacue; Jesosaja esohui jama ameesahuacue! —eya poani.

⁶Jesosa nijje ojee jjapeequianijo miquianaaya ojee Ecacuiñajji bihuiaña sohuicuayanijo, esejaya Emeshi Mese nei Jesosa Quitoja Chii miquianaaya bihuiaña jama ba'a: —Ecacuiñajji, miya ca ca oe quea pame nee, quea ca'a nee. Pea chama' mi jayojja —jamaya miquianaya poaje'yo tii tii.

¡Pea cuana nijje quea ja'a jjapeequicue!

⁷Jamajjeya ¡Jesosa Quitohua miquianaya quea jea acani jayojja jama ojaya epreejji cuana quea jea nee acue! Jamajoya pea cuaa jama acaje ba'a: —E'e, Ecacuiñajji quea pame nee nee. Ojaya epreejji cuaa onaya quea jea nee acani.

⁸Yahuajo nei Ecacuiñajjiya ecuanaja etiiquiana huohui ca poa jama ba'a: “Eyaya miquiana huasijje huoojeaje ojjaña jaahuanajji” poa.

Jamajjeya Jesosa Quito huoojea nei canaje ojaya yahuajo ehuoojeapana poa jojoya. Jamajjeya eseya ba mee canaje Ecacuiñajjiya ohua aca poa esohui jayojjaya e'e jojo nei acani. ⁹Oya Jesosa poeyanaje Jodio pojjeama cuana Ecacuiñajji bihuia meeya pealai, jama po meeya pealai ba'a:

“Ecacuiñajji, miya quea pame nee nee, quea ca'a nee nee. Ecuanaja mimishi cuanajo jjashahuuba tiitiiqui ajja. Cuijea'yo majje quea bei ecuana nijje poani”.

Yahuajo nei Ecacuiñajjiya Dabi tehue mee ca poa oja sohui jama ba'a:

“Jamajjeya eyaya Jodio pojjeama cuana nijjeya miya bihuiaje.

Sohuicuaya majje miya bihuiaje”.

Jamaya yahuajo nei nei poa. ¹⁰Yahuajo nei tehue mee ca poa jama pealai ba'a:

“Jodio pojjeama cuana, ¡Jodio cuana nijjeya Ecacuiñajji bihuiaque!

¡Quea bihui nee nee pocue!”

¹¹Jamaya tehue mee ca poa pealai ba'a:

“Jodio pojjeama cuana, ¡Ecacuiñajji bihuiaque! E'e, ¡ojjaña cuaa

Ecacuiñajji bihuiaque, sohuicuayacue jama ba'a: —Ecacuiñajji, miya quea pame nee —jamaya acue!”

Jamaya aca poa. ¹²Eyacuiñajjiya Isaia tehue mee ca poa jama ba'a:

“Quijje nei nei Isaija osecua cuayaje. Oya ona huoojea'yojji poaje'yo.

Ohuaya Jodio pojjeama pe'a'i mimishi cuijea'yo majje ba mee caje'yo, onijje ba'e tiitii mee caje'yo”.

E'e, jamaya yahuajo nei Isaia tehue mee ca poa Jesosajo. ¹³Jamajjeya Eyacuiñajjiya eseya ba meesahua cani jama ba'a: Quijje ohuaya eseya ba'e tiitii mee caje'yo eyajo onijje. Eya Eyacuiñajji nijje mimi majamajani miquianajo jama ba'a: —Eyacuiñajji, ¡miquea epeeiji cuana Shomajo ba'e quea bihui nee po meecue! ¡Minijje jjapeequianijo quea ja'a nee jjashahuabaqui meesahuacue! —eyaya aña.

Edojjoshahua Pame miquiana nijje nequi. Oya quea ca'a nee nee. Miya ba meesahua cani miquiana quijje Eyacuiñajji nijje ba'e tiitije'yo eyajo.

Pabohua Shomano cuana Jodio pojjeama cuana baqui sa acani

¹⁴E'e ecuea epeeiji cuana, eya ca ca iña miquianajo jjashahuabaquianji jama ba'a: Miquianaya Jesosaja epeeiji quea pame nee. Miquianajaya eba nei nei Eyacuiñajjiya esohui e'e nei Jesosajo. Ma esohui huohui huicha'a huicha'aña. Pea cuana quea ja'a nee jjapeequi meesahuaña Jesosa nijje, miquianaaya. ¹⁵Jamatii Eyacuiñajjiya eya huohui canaje jayojja jama eyaya miquiana huasijje oja sohui tehuename. Beca ejjashahuabaquijji quea ja'a nee nee tehuename mi jjabahuejjaqui meeiji, miquianajaya epajealoyiji pojjeama. ¹⁶E'e, Eyacuiñajjiya eya huoojea canaje Jodio pojjeama huasijje ojaya esohui huohuiya, Jesosajo ehuohuijji. Jiquio ecua yahuajo nei Eyacuiñajji nijje emimiji Jodio huasijje Eyacuiñajjiya esohui aca poa jayojja jama eyaya ojaya esohui Jesosajo cahuohuihua miquiana que, Jodio pojjeama huasijje Jesosa nijje ejjapeequi meesahuajji. Jesosa nijje jjapeequianijo, Eyacuiñajji miquiana nijje quea bihui nee poani, Edojjoshahua Pameya pea jjashahuabaquime po mee ca'yanijo.

¹⁷Jamajjeya eya quea bihui nee poani. Jesosa Quitohua eya Jodio pojjeama cuana huasijje Eyacuiñajjiya esohui huohui meesahua cajje ojaya epeeiji cuana poanaje. ¹⁸Jiquio ca ca oe eyaya miquianaya quea bihui huohuiña jama ba'a: Jesosa Quitohua Jodio pojjeama quea pame ba'e meesahua cani Eyacuiñajjiya esohui jama ojaya epeeiji nei epoiji. Ohuaya jamaya acanaje eya ojaya esohui huohuijji poanijojo. E'e, Jesosaa eya ameesahua canaje, huohui meesahua canaje pe'a'i jama ba'a: ¹⁹Eya Edojjoshahua Pameya ma dejjaajjima acani ameesahua canaje. Jamaya eya esohui huohui meesahua canaje quea ja'a nee Jenosanena huasijje, quea huesha nee pe'a'i, johuaam Ininico huasijje pe'a'i eyaya ojjaña Eyacuiñajjiya esohui quea pame nee Jesosajo huohui neinei poquia poa. ²⁰Jamaya eyaya esohui huohui sa aña pea cuana huasijje, onaja sohuihuohuiqui jjima huasijje. E'e, jiquio esohui quea pame Jesosajo shajja'ajja jjima cuana huasijje eyaya ma esohui huohui sa aña. ²¹E'e, yahuajo nei Eyacuiñajjiya esohui etehue'yo jama aca poa ba'a:

“Ojjañaja yahuajo shajja’ajja jjimaa Eyacuiñajjija huoojea’yo ojjaña jaahuanajjijo shajja’ajja caje. Ojjañaa joya o ba pojimaa oya ba caje”. E’e, jamaya eyaya a sa aña, Eyacuiñajjija esohui etehue’yo yahuajo jama.

Pabo Shoma huasijje poqui sa poani Jesosaja epeejji cuana baa

²²Yahuajo eya quea huiso poqui sa poa Shoma huasijje miquiana baa. Jjeya pea’ai eya poqui sa poani. Quea huiso pea cuana huasijje esohui huohui poequi jjejojo mi poquinaje. ²³Jjeya ca ca eya apoa. Ojjaña cuiñajji yasijje jiquiojo esohui huohujeyonaje. Jamajjeya ma ecua eya yahuajo jjashahuubaquinaje jamaya eyaya jjeyahua nei aje. ²⁴Eya poqui sa poani España meshi yasijje esohui huohuiya. Jamajjeya España meshi yasijje poquijeya eyaya miquianaya bananaje. Shomajo anije beca cahuime pojja’la. Queabihui nee nee eya poaje miquiana nijje nequinana majje. Miquiana nijje mimi majje eya poquije España meshi yasijje. E’e pojja’la miquianaaya eya aquiana quiaje epoqui meesahuajji pojja’la. ²⁵Miquiana huasijje poqui jjimahua eya poquije so’lo Jenosanena huasijje Jesosaja epeejji aema huasijje ejjeshejji quiaa, Jodio cuana huasijje. ²⁶Ma ejjeshejji Jesosaja epeejji cuana Masenonia meshijo ba’leya, Asia meshijo ba’leya pea’aliya chicha canaje Jesosaja epeejji aema’ ba’le meesahuajji. Jamaya oya cuana a sa poanaje. Oya Jodio pojjeama poani. ²⁷Jamatii quea bihui nee quia canaje. E’e, ohuaya ejjeshejji caquia cahua Jesosaja epeejji Jodio cuana ba’le meesahuajji. E’e, Eyacuiñajjija Jodio cuana iyaa coo ca poa ojaya epeejji epoji. Majoya Jodio cuaa Eyacuiñajjija esohui quea pame nee Jesosajo Jodio pojjeama cuana huohui cajje Jesosa nijje jjapeequinaje. Jamajjeya Jodio pojjeama cuaa Jodio cuana huasijje eba’le meeiji cahuojea cahua, Jesosaja epeejji cuaa. ²⁸Jamatii Jenosanena huasijje poqui majje, ma ejjeshejji quia majje eya poquije España meshi yasijje. Poquijeya eyaya miquianaya bananaje. ²⁹Miquianaya banana majje quea bihui nee nee poaje. Ojee jjapeequianijo, Jesosaja esohuijo eseaya quea bihui nee poaje’yo.

³⁰Epeejji cuana, esejaya Emeshi Mese nei Jesosa nijje jjapeequianijo, Edojjoshahua Pameya eya miquianajaya quea jea ameesahua canijo, ¡Eyacuiñajji nijje mimicue ejo! ¡Jama acue ba’la: —Eyacuiñajji, Pabo miquea esohui huohui canijo quea camaja nee nee. ¡Oya jaahuanan neineicue! ³¹Jamatii Jenosanena huasijje poqui majje, ma ejjeshejji quia majje eya poquije España meshi yasijje. Miquea epeejji jomajo ba’le quea bihui nee ejjeshejji jjeshe meesahuacue ma Pabohua ye cani! —jama oe miquianaaya acue Eyacuiñajji nijje mimi majje!

³²E’e pojja’la Eyacuiñajjija eya miquiana que huoojea caje. Ohuaya eseaya quea bihui nee jjapeequi meesahua caje quea pame nee.

³³Eyacuiñajjija eseaya quea bei ba’le meesahua cani. ¡Ohuaya miquianaya cajaahuana cahua! ¡Jamaya capoahua!

Pabohua Jesosaja epeejji cuana huasijje tehue canaje quea bihui o pojji

16 ¹Ecuanaaja epeejji epona Peme bajjani Jesosa nijje chacochacoani Senesea cuiñajjijo. Oya Jesosaja epeejji quea pame nee. Jesosaja

pea epeejji cuana jaahuana cani. ²Miquiana que poquiyajo, ¡oya huohuicue jama ba'a: —Mi poeyajo ecuana quea bihui nee —acue!

Ohuaya eya ba'e meesahua cani, pea Jesosaja epeejji cuana pea'ai ba'e meesahua cani quea huiso nee. Jamajjeya miquianaya Jesosaja epeejji poani pea'ajio ¡oya ja'ajjequicue! ¡Oya aquiana quiacue eba'ejji! ³Pisina pea'ai, oja yahue Aquiana pea'ai miquiana nijje ba'e. Oya huohui'ajjacue jama ba'a: —¿Achajja acuae quiana so'o? —ecuea ebajji.

Oya cuana enijke chacochaconaje. Jesosaja esohui huohui sahua canaje. ⁴E'e, eyaya Jesosaja esohui huohuiañajo, pea cuaa cuia'ajja canaje. Pisina, Aquina pea'ai ca ca e nahuejo beshahua nei cuia canaje cuaa. Jamajjeya eyaya, Pabohua Jesosaja epeejji Jodio pojjeama cuana nijjeya oya huohuiaña jama ba'a: —E'e, jamaya miquianaya quea pame nee nee poanaje —ecuaaya anaje.

⁵Ojjaña Jesosaja epeejji cuana ma Pisinaja equijo jjachichaquiani eyaya huohui'ajjaña jama ba'a: —¿Achajja acuae quiana ani so'o? —ecuanaja ebajji.

Jamaya acue pea'ai ecuea epeejji Epeneto bajjani. Asia meshijo ba'ya poa oya. Ecuea esohui Jesosajo shajja'ajja majje oya ebionei Jesosaja epeejji poanaje jomajo Asia meshijo ba'yahu. ⁶Mania pea'ai quea huiso chacochaconaje miquiana nijje. ¡Oya ecuea esohui huohuicue quea bihui nee o pojji! ⁷¡Oya jayojjaya mimicue Anidonico nijje, Jonia pea'ai nijje! Oya Jodio cuana, ecuea huapa pojjeama cuana. Oya enijke ejeanobia jaanaje. Jesosaja epeejji quea pame nee oya poa, Jesosaja huoojea'yo esohui huohujiji. E Jesosa nijje jjapeequi jjimahuajo oya cuana jjapeequia poa. ⁸¡Oya jayojjaya mimicue Amepia nijje pea'ai! Oya Emeshi Mese nei Jesosaja epeejji nei. Jamajjeya: —¿Achajja ami ani so'o, ecuea epeejji? —acue oya, ecuea ebajji.

⁹¡Oya jayojjaya mimicue Omano nijje, ma ecuana nijje Jesosa Quito nijje chacochaconaje! ¡Etaqui pea'ai, ¹⁰Apene pea'ai jama acue! Oya Emeshi Mese nei nijje chacochacoanijo quea nee poanaje quea huiso. Ecuana eba oya Jesosaja epeejji quea ca'a nee. ¡Ojjaña Anisitomoja huapa pojjeama cuana ecuea esohui huohuicue pea'ai quea bihui nee o pojji! ¹¹¡Jodio dejja Jenonio bajjani jama acue! Oya huapa pojjeama pea'ai poani. ¡Oya Nasiso, Nasisoja huapa pojjeama ecuea esohui huohuicue pea'ai, Jesosa nijje jjapeequianijo! ¹²¡Tipena, Tiposa oya jayojjaya huohuicue! Ma epona cuana Emeshi Mese neijo, Jesosajo quea huiso chacochaconaje. Epona Pesina bajjani pea'ai Emeshi Mese neijo janobajjima nei chacochaconaje. ¡Oya pea'ai ecuea esohui huohuicue, ecuea epeejji nei oya! ¹³¡Jamaya mimicue Shopo nijje, ojaya enaese nijje pea'ai! Ojjaña eba Jesosaa, Emeshi Mese neiya Shopo babaca canaje ojaya esohui huohujiji. Ojaya enaeseya eya jaahuana canaje ecuea enaeseya jayojjaya. ¹⁴Jamajjeya oya jayojjaya huohuicue ejo Jesosaja pea epeejji cuana nijje pea'ai, ma bajjani cuana nijje ba'a: Asinisito, Peconete, Jemesi, Patomasi, Jemase pea'ai. ¡Ojjaña Jesosaja epeejji onijje nequica pea'ai jamaya acue! ¹⁵¡Ecuea esohui quea bihui nee o pojji huohuicue Pinonoco, Joña, Neneo, oja jjo'i pea'ai, Onipa pea'ai ojjaña Jesosaja epeejji cuana onijje nequica pea'ai huohuicue!

¹⁶E'e, miquianaya jjachichaqui majje ¡pea cuana nijje quea bihui nee mimicue jama ba'a: —¿Achajja ami ani so'o, epeejji? —acue!

E'e, ojjaña Jesosaja epeejji cuaa jiquiojo enijje nequiya miquianaya Shomajo ba'e quea bihui nee acani jama ba'a: —¿Achajja acuae quiana ani so'o? —acani ojaya ebajji.

Mahuiso.

Pabohua pea esohui quea ja'a nee eba'e meeiji huohui cani

¹⁷Ecuea epeejji cuana, eyaya miquiana cuana pea esohui tehueaña jama ba'a: Beca cuaa miquiana nijje nequiya Jesosaja epeejji cuana pea epeejji cuana nijje jjamimicuajea nobiajea meeque cani. Pea esohui e'e nei pojjeama Jesosa Quitojo huohui cani pea'ai, ecuanaja esohui jayojja jama pojjeama. Ecuaaya ca ca e'e nei esohui huohuaña. ¡A'a oya cuana shajjal'ajjajji! ¡A'a jja oe onijje jjapeequijji! ¹⁸Ma siajjepoji cuana esejaya Emeshi Mese neijo Jesosajo chaco ajja. Chojja. Oya cuana esohui huohujji nisho. Ojaya ejashahuubaquijji quea quehua jayojja jama acani. Mimiani esohui quea pame jayojja. Jamatii quea tai. Siajje poani. Jama poani ba'a: —E'e, eya miquianajaya epeejji; miquianaya quea pame nee ecuea epeejji —anisho cani. Jamaya Jesosaja epeejji quea jjashahuubaqui ja'a pishana dasia cani.

¹⁹Ojjaña Jesosaja epeejji cuaa shajjal'ajja canaje miquianaya Shomajo ba'e Eyacuiñajjiya esohui jayojjaya ba'yani. Jamajjeya eya miquianajo quea bihui nee. ¡Quea ja'a nee jjashahuubaquicue quea pame nee eba'ejji! ¡Ma esohui huohujji nishoja esohui e'e nei pojjeama a'a shajjal'ajjajji! ¡A'a jamaya pojji!

²⁰E'e, Eyacuiñajjiya eseaya quea bei ba'e meesahua cani, quea ja'a jjashahuubaqui meesahua cani jjeya nei. Ohuaya miquianaya Edosiquianaja epeejji mimicuajeobiajea meesahua caje'yo. Miquianaya ojaya edasia'yojji pojjeama. E'e, ¡Jesosa Quitohua esejaya Emeshi Mese neiya miquianaya cajaahuana cahua!

²¹Timoteo enijje chacochacoani Jesosa Quito nijje. Ohuaya pea'ai miquianaya jama huohui'ajjame acani ba'a: —¿Achajja acuae quiana ani so'o? —acani.

Ecuea huapa pojjeama Jodio dejja cuana Nosio, Jasoni, Sosipate pea'aiya jama huohui'ajjame acani ba'a: —¿Achajja acuae quiana ani so'o? —acani pea'ai.

²²⁻²⁴Cayo pea'ai oya jayojjaya miquiana nijje mimiani. Eya oja equijo ba'e. Ojaya equijo Jesosaja epeejji cuana ojee jjachichaquiya Eyacuiñajjiya esohui baa. Enasitohua, pea epeejji Cuanito bajjaniya pea'aiya huohui'ajja mee cani jama ba'a: —Epeejji cuana, ¿achajja acuae quiana ani so'o? —acani. Oya Enasito ejjeshejji cuiñajji poani, ma Conitio dejja etiiya chicha mee cani ejjeshejji.

Eya ca iña Jesosaja epeejji Tesio bajjani. Eyaya Paboja esohui miquiana que tehueaña ojo. Eyaya miquianaya huohuaña jama ba'a: —Miquianaya Jesosa Quitoja epeejji, esejaya Emeshi Mese neija epeejji poanijo, ohuaya miquianaya quea pame nee cajaahuana cahua. E'e, jamaya capoahua —jamaya Pabohua eya tehue mee cani.

Eyacuiñajji bihuia cani Pabohua

25 Eyacuiñajji ejjabihuiaqui jama ba'a: —Eyacuiñajji, miya quea pame nee, quea ca'a nee nee. Miquea esohui jayojja jama ba'e meeaña ecuanaya. Eyacuiñajji, miyaya eya huohui meesahuaña esohui quea pame nee Jesosa Quitojo. Ba meesahuaña Jesosa Quito ca ca oe mimishi cuijea'yojji poani ojjañaja. Maya yahuajo ecuanaja etiiquianaja ba jjima poa. 26 Jodio esohui huohuijjji yahuajo nei ba'ya poaa Jesosajo huohui ca poa quea ja'a pishana, ojaya ba jjima pishanajo. Jjeya ca ca ma esohui e'e nei miyaya ba meesahuaña quea ja'a nee.

—E'e Eyacuiñajji, miya ba'e tiitiani. Miya ca ca oeya ojjaña cuana ojjaña meshijo ba'e ba meesahuaña esohui e'e nei Jesosaja. Ma esohui quea pame jayojja jama ameesahuaña pea'ai. Jamaya ojjañaja eba poaje.

27 —E'e Eyacuiñajji, miya oe nei Eyacuiñajji, pea chama! Ojjaña ca ca oe miquea eba, miquea nei. Ecuana Jesosaja epeejji poanijo ecuanajaya eba miya quea pame nee nee, quea ca'a nee poani tii tii. Jamaya capoahua —jamaya ejjabihuiaqui Eyacuiñajji.

Eya Pabo bajjani. Mahuiso ecuea esohui miquiana Shoma cuiñajjijo ba'e yasijje tehue meeaña. Apoa.